

賢母賢婦 令德令儀
斷機戒旦 萬世女師

勸勞集 卷二 女德

袁長春題



| | | | | | |
|------|------|------|------|------|------|
| 閨閣淑媛 | 德莫能數 | 柔和從容 | 寡笑謹語 | 質樸靜端 | 循規蹈矩 |
| 孝順雙親 | 恭敬兄弟 | 早起晚眠 | 儉用少取 | 學做衣裳 | 學習烹煮 |
| 整理家具 | 打掃房宇 | 勤讀經書 | 深信因果 | 迨出閨閣 | 禮視夫主 |
| 敬奉翁姑 | 妯娌相輔 | 厚待親族 | 善教子女 | 寬恕傭僕 | 體恤貧苦 |
| 留心門戶 | 潔祭宗祖 | 念佛持齋 | 求生淨土 | 女德輝煌 | 昭如寶炬 |
| 闔族增光 | 名留千古 | | | | |

封面上之斷機二字。係指孟母。詳六頁擇鄰斷機節。戒旦二字謂古之賢妃。警君之早朝也。詩經曰。雞既鳴矣。朝既盈矣。匪雞則鳴。蒼蠅之聲。○東方明矣。朝既昌矣。匪東方則明。月出之光。○蟲飛薨薨。羣飛聲也。甘與子同夢。會且歸矣。無庶予子憎。○蓋賢妃侍寢於君。警戒之心切。寔安之意忘。忽聞蒼蠅之聲。誤以爲雞。而告君曰。雞鳴矣。來朝之臣。盈廷矣。忽見月出之光。誤以爲日。再告君曰。東方明矣。來朝之臣。既盈集矣。三告君曰。蟲飛薨薨有聲。天明之候也。承子衽席之寵。遂吾繡繆之私。豈不甘心與子同寢而夢哉。但會朝之臣。待君不出。且散而歸矣。豈不相憎曰。妃之惑君心也如此。君之耽女寵也如此。是以我之故。爲子之憎也。無庶予子憎哉。夫愛勤者。丈夫之事。依戀者。婦人之常。賢妃忍於拂君之樂。惟懷勤政之心。可爲萬世夫婦之法矣。（閨範）

劬勞集女德篇序

人與禽獸之分。有倫與無倫而已。舍人倫。則無道德教化政治可言。故人倫以外。無道德無教化無政治。古聖賢立言垂教。無一非闡明人倫之理。孝者。人倫之本。孔子著孝經。至謂孝可以治天下。通神明。光四海。災害不生。禍亂不作。非夸言也。海通以來。人人致力於科學。而於倫常之道。則迂之以爲不足道。人心風俗。如江河之日下。而殺人利器。則日巧日酷。盈天地間。無非殺機。於是而戰禍作矣。丁丑秋。余避地於鄉。輯孝感錄。戊寅春。至申謁聶雲台丈。許爲之釀資刊行。囑以稿呈真達德森兩法師。時真達法師創劬勞社。方編劬勞集第二集女德。囑爲助勸。風詩三百。首關雎。誠以夫婦之道。爲王化之原。女教之衰。至今日而極。真達法師編劬勞集。及於女德。誠知所本矣。而余則感不禁焉。余自幼善病。父母提攜顧復。其劬勞尤倍尋常。之爲父母者。而罔極之恩。未報涓埃。先母王太夫人。自歸先

君四十餘年。無片辭相忤。先王母病咯血。晝夜侍寢側。衣不解帶者逾四閱月。律身勤儉。食不兼味。衣不厭故。終身如一日。方古之賢母。何多讓焉。而余碌碌鄉閭間。一無所成。不克有所顯揚。撫衷自問。真不可爲子。不孝如余。其何能爲役。雖然。世變亟矣。兩法師欲以孝道挽劫運而正人心。苦心孤詣。至可佩仰。夫人孰不有父母。孝者。人之良能也。苟念及劬勞之恩。幸而父母俱存。則及時盡孝。不幸而心傷風木。則宜追慕瞻念。勉爲善人。以顯揚其親。自盡其倫常之道。擴其孝親之一念。而及於家邦。爲女子者。以編中所載。而取法焉。經正民興。賢母孝子。忠臣悌弟。將接踵而起。以親愛禮讓之風。消弭兵革之氣。茫茫浩劫。庶可挽乎。遂不敢辭。校讎既竣。敬敘蕪言。以告世之讀是書者。民國戊寅秋。海鹽談文烜序。

例言

一本篇依第一集之編輯大要。而爲第二集。集古來之母教婦道等。計十章。編末更附女誠女論語傳。以爲婦女之規範。

一體裁遵照第一集之例。惟每節之上。各冠以題目四字。

一教育爲立國之本。而母教尤爲家庭教育之主體。故以母教列於首章。一男女居室。人之大倫。而內助賢能。尤爲世所稱頌。故母教之後。卽繼以婦道。

一女也。而能盡子職。婦也。而能盡夫職。以敬以愛。孝其父母。孝其舅姑。誠爲天下之至德也。故於第一集中。婦女之孝行。已屢爲宣揚。茲再特以孝行終之。且符本社名勸勞之意。

一古來婦女之懿德。足以訓世者。美不勝搜。今以篇幅關係。足備法程而已。

一編輯時間短促。謬誤在所不免。大雅君子。祈加指正。

目次

談序

例言

第一章 母教 三十則

班昭女誡 一

太姜率導 三

太任胎教 三

太姒徽音 三

擇鄰斷機 上六 以德教以

知子刑戮 七

仁濟軍旅 九

孝化愚頑 一〇

死獄求生 上一 以仁民以

廉而有化 二二

清恪仕訓 一三

好惡消息 上一 五以上廉潔以

賈母明義 一六

苞母捐軀 一七

勸子及孫 一八

冀盡言責 上一 九以上教子忠義

勞逸興亡 二〇

菽粒同甘 二一

嬰母度德 二二

陵母知興 二三

責子定軍 二五

警惕爲君 上二 七以賢智以

誠交損友 二八

使結勝己 二九

親賢遠佞 三〇

毋事臧否 三一 以上戒子慎交

咀嚙熊丸 三二

不忘貧賤 三三

教子成名三四

以禮治家三六以上
治家有法

第一章

婦道二十四則

缺妻敬饁三七

鴻光舉案三八

提甕挽車三九

庾妻散財四〇以上
安貧相敬

善爲夫謀四〇

勤苦助廉四一

仰事俯畜四二以上
內助賢能

勵志養姑四三

勢不兩全四四

奉姑遠戍四五

鄭徐雍睦四六

後進當勞四七

矜卹弟妹四八

厚遇小姑四九

不擅私財五〇以上
敦睦親戚

趙姬立盾五二

謙謙自下五三

不專夫室五四

不擅寵愛五五以上
上能容以

窺御激夫五六

毋泣牛衣五七

厲夫脫囚五八

不死於邪五九以上
上激勸以

義命自安六〇
此賢達

第二章

賢后四則

馬后練服六一

鄧后辭讓六二以上
上克己以

長孫規諫六三

保全功臣六四以上
上輔君以

第三章

母儀二則

嗣母慈仁六五

教子義方六七

第五章

仁德 四則

富貴不驕 六八

儉德免禍 六九

以儉化人 七一
上節儉以

仁孝天成 七一
此孝慧

第六章

高節 七則

尙德緩刑 七三

不有私財 七四

擇賢而事 七五
上尙德以

義救生靈 七六

棄子存姪 七七

割愛從夫 七八

不悔瘋女 七九
上仁義以

第七章

貞烈 十則

全父潔己 八〇

烈女驅邪 八二

烈女血痕 八四

貞婦清風 八四

血磚千古 八五

忍死全孤 八六

刻像事夫 八八

誓不再適 八九

急智全節 九〇

忍貧守節 九一

第八章

樂施 三則

代民輸稅 九二

樂善好施 九三

曹妝奩路 九五

第九章

婉諫 八則

不索民財 九六

賢德太后 九七

諫止征伐 九八
上愛民 以

勸夫行義 九九

藉婢規夫 一〇〇

片語悟夫 一〇一

歌諷奢侈 一〇二
上勸崇德 以

孝智兼全 一〇三
諫母仁慈 此

第十章

孝行 十則

冬月生桃 一〇四

隆冬產麥 一〇四

大士佑孝 一〇五

篤誠格天 一〇七

骨化爲金 一〇八

孝延姑壽 一〇九

至孝驚天 一一〇

割股愈親 一一一
以上孝感

願代父死 一二二

伏闕鳴冤 一一三
以上救父

附錄

女誠 一二四

女論語傳 一二〇

跋

是書編輯既竟。將欲付印。而兵燹忽起。被害人民。盈城盈野。不禁爲之心傷。茲閱淨土十要。見附杭州念佛婆傳云。元至順庚午。浙西連歲饑饉。杭州城中。餓殍相枕藉。有司令坊正倩人昇棄六和塔後山大坑中。有一婆子。兼旬不腐爛。每日居眾屍之上。人怪之。搜其身。懷中有小囊。貯念彌陀佛圖三幅。事聞有司。爲買棺殮。焚之。煙焰中現佛菩薩像。光明燁燁。因此發心念佛者極眾云。又聞喬智如居士云。此次軍隊至彼鄉。上海縣屬之六磊塘口。該處有一關帝廟。以軍事關係。完全被燬。各像亦被破壞。惟其中所供之觀世音菩薩。依然完好。雖屋頂已穿。樑木已燼。瓦片滿地。而龕子純係木質。原易著火之物。乃其頂不損。左側亦不損。右側亦不損。後面固無恙。而前面之齋匾亦無恙。僅一方大玻璃。則爲火所灼破而已。現此大士聖像。已遷至省殿子廟。該廟後殿。原亦供觀音大士像。且由喬居士及金善生居士等。成立滬西念佛社於其內。故軍隊雖曾住於其中者累月。亦毫無所損云。夫阿彌陀佛。發四十八大願。接引念佛之人。往生淨土。觀世音菩薩。廣運慈悲。救度拔濟一切眾生。而當此饑饉疾疫。刀兵水火。億萬人民。於困苦顛連之中。更頻頻示現其靈感。誠所謂大慈大悲。救苦救難者矣。

劬勞集第二集

劬勞社同人敬輯

女德篇

第一章 母教

詩書之言女德。尙矣。蓋治平本於修齊。修齊資乎內助。況家庭教育。尤以母教爲先。不有懿範啓迪。何由冀其子之賢。而所以造就賢母者。不愈重乎。印光法師嘗言。教女爲齊家治國之本。旨哉言也。本篇特以母教開其端。而首列班昭女誡焉。

班昭女誡 漢班昭。字惠姬。扶風曹世叔妻。同郡班彪女也。博學高才。世叔早卒。有節行法度。兄固著漢書。未竟而卒。和帝詔昭踵成之。又數召入宮。令皇后諸貴人師事焉。號曰大家。漢書初出。多未能通者。馬融伏於閣下。從昭受讀。昭作有女誡七篇。其首曰。鄙人愚暗。受性不敏。蒙先君之餘寵。賴母師之典訓。年十有四。執箕帚於曹氏。於今四十餘載矣。戰戰兢兢。

常懼黜辱。以增父母之羞。以益中外之累。夙夜劬心。勤不告勞。而今而後。乃知免耳。吾性疏頑。教導無素。恆恐子穀負辱清朝。聖恩橫加。猥賜金紫。實非鄙人庶幾所望也。男能自謀矣。但傷諸女方當適人。而不漸訓誨。不聞婦禮。懼失容他門。取恥宗族。吾今疾在沈滯。性命無常。念汝曹如此。每用惆悵。閒作女誡七章。願諸女各寫一篇。庶有補益。裨助汝身。去矣。其勸

勉之。此述閨教。○女誡七章附錄本集後

不辱父母。孝之大也。以德為教。愛之大也。世之女子。苟習於班氏之戰兢。悚懼殷殷。誥誡則鈞陶所及。則效相循。人人可為賢母。人人可稱孝女矣。至後世之女訓女則。皆本班氏之旨。而啓迪閨闈。互見次章。

【音釋】尙崇也。○懿美也。治平。言治國平天下。修齊。言修身齊家。見大學。資取也。○懿美也。啓迪。開導也。迪音狄。○旨哉。言得其意旨也。○誠

誥誠也。○彪音標。○未竟。未終其事也。踵。繼續之意。○數屢也。音朔。貴人宮中妃嬪大家女子尊稱。家音姑。○暗。不明也。敏聰慧也。○蒙承也。寵恩榮也。賴倚恃也。母傅母師。女師。典則也。○頑。愚頑。素誠也。按大家子成。封子之職也。○戰兢。恐懼貌。黜。貶下也。○頑。愚頑。素誠也。按大家子成。封

關內侯官至齊相殺成之字也。○猥多也。金紫謂金印紫綬。○傷愛也。漸進也。○沈深也。滯積也。○裨益也。○勸勉也。●鈞陶言陶冶之爲器。以喻教化之意。則法也。效仿也。循環覆也。

太姜率導。太姜者。王季之母。有呂氏女。太王娶以爲妃。生太伯。仲雍。王季。貞順率導。靡有過失。太王謀事遷徙。必與太姜。君子謂太姜廣於德教。太任胎教。太任者。文王之母。摯任氏中女也。王季娶爲妃。太任之性。端一誠莊。惟德之行。及其有娠。目不視惡色。耳不聽淫聲。口不出傲言。能以胎教。文王生而明聖。太任教之。以一而識百。卒爲周宗。君子謂太任能以胎教。

太姒徽音。太姒者。武王之母。禹後有莘。姒氏之女。仁而明道。文王嘉之。親迎於渭。造舟爲梁。及入。太姒思媚太姜。太任。旦夕勤勞。以進婦道。太姒號曰文母。文王治外。文母治內。太姒生十男。教誨之。自少及長。未嘗見邪僻之事。及其長。文王繼而教之。卒成武王周公之德。詩曰。太姒嗣徽音。則

百斯男。

印光法師云。周之開國。基於三太。而文王之聖。由於胎教。是知世無聖賢之士。由世少聖賢之母之所致也。使其母皆如三太。則其子縱不爲王季文王周公。而爲非作奸。蓋亦鮮矣。而世人祇知愛女。任性嬌慣。不知以母儀爲教。此吾國之一大不幸也。人少時。常近於母。故受其習染最深。今日之人女。卽異日之人母。人欲培植家國。當以教女爲急務。勿曰此異姓之人。吾何徒受此憂勞哉。須知爲天地培植一守分良民。卽屬莫大功德。況女能德鎮坤維。其子女必能肖其懿範。榮何如之。況自己子孫之媳。亦人家之女乎。欲國家崛起。非賢母則無有資助矣。

蔡六龍云。太任胎教。今古昭垂。厥後太姒行之。篤生武王周公。邑姜效之。篤生成王。卽孔孟之母。亦復如是。近世歐風東漸。對於禮教。輒多攻擊。獨胎教一事。視爲重要。願女同胞審思之。

昔有一希臘人。遣子就學。謂其師曰。此子頑劣。宜督責。師嚴約束。而怙惡不悛。逾年遣次子就學。復謂師曰。此子聰慧。循循誘之可矣。師唯唯。次子果穎悟勤奮。學銳進。師怪而問之曰。同爲若子。何不類之甚。抑何知之深耶。對曰。育長子時。余夫婦習於不善。作奸犯科。靡不與焉。次子之誕。方悔自新。致力事業。二子稟賦殊。胎教異。安得不判若霄壤。觀此。知善惡莫不遺傳子女。欲賢子女。豈可不先正其心哉。而惡惡相承。尤足懼焉。先天畀與。妊育垂教。當並重。不可偏廢矣。願世人鑑之。慎之。

【音釋】貞正也。率循也。導引也。靡無也。徒音洗。指太王避狄遷岐山之下事。見孟子。摯音志。中女猶言次女。娠孕也。淫聲。淫亂之聲。傲慢也。宗尊之也。本也。蓋言文王始興周室之意。嗣繼續也。徽音猶言德音。似。嘉之美之也。梁橋也。媚親順也。嗣繼續也。徽音猶言德音。似。縱。即使也。鮮上聲。少也。橋同驕。坤道成女。故以喻女。維紀綱也。岫勃然興起也。昭明也。垂下示之意。厥其也。篤厚也。言得天獨厚也。漸音尖。流入也。謂歐西風俗流入中國也。希臘歐洲古文化國。怙倚也。悛改也。循循順其性而教之也。誘引導也。唯音委。應諾也。畀與付結也。鑑觀鑑也。

擇鄰斷機。孟母仇氏。孟軻之母也。初舍近墓。孟子少嬉戲。爲墓間事。母曰。此非吾所居。乃去。舍市傍。孟子嬉戲爲賈人街賣事。母曰。此非吾所居。復徙舍學宮之傍。孟子嬉戲。乃設俎豆。揖讓進退。母曰。可矣。遂居之。及孟子長。學六藝而歸。母方織。問學所至。孟子曰。自若也。母以刀斷其織。曰。子廢學。若斷斯織也。夫君子學以立名。問以廣知。柰何廢之。孟子懼。旦夕勤學。以上德教。

呂坤曰。教子若孟母。古今稱賢焉。世俗婦人。姑息以養子惡。掩護以格父教。長也不才。乃深自忿恨。付之無可柰何。不亦晚乎。

今之言教育者。亦重視兒童心理。與夫環境之薰陶矣。蓋人當年幼。血氣未定。性富摩仿。近朱赤。近墨黑。唯此時爲甚。視其心之所萌。行有偏嗜。善則獎掖之。惡則抑制之。固可以稱善教。然探求本源。處以良善環境。使聲色犬馬驕奢淫佚之事。不見於目。不入於耳。不尤愈乎。孟母三

遷。卽此旨也。惟今之人鮮有知而能行者。舍不擇鄰。固無論矣。卽學校設立。其能顧及環境良否者。有幾人哉。況復社交公開。侈談戀愛。同學共職。男女無別。欲學之不廢。其可得乎。

【音釋】賈仇音掌○舍去聲居處也。○賈音古賈人。商人也。銜讀若縣行言相似也。○知去聲同智。●姑且也息休也禮檀弓細人之愛以姑息。言姑且養息無遠識也。掩護謂掩蔽迴護之意格阻也。●萌動也嗜好也。獎掖勸進也。抑制遏止也○淫佚放蕩也。

知子刑戮 嚴延年爲河南太守。所在名嚴能。冬月論囚。流血數里。河南號曰屠伯。其母常從東海來。欲就延年臘。到洛陽。適見報囚。母大驚。便止都亭。不肯入府。延年至都亭謁母。閉閣不見。延年免冠頓首閣下。母乃見之。因責數延年曰。幸備郡守。專治千里。不聞仁義教化。有以全安愚民。顧多刑殺。以致威。豈爲民父母之意哉。延年服罪頓首謝。將歸。謂延年曰。天道神明。人不可獨殺。我不自意老當見壯子被刑戮也。行矣。去東海爲汝

掃除墓地耳。遂去。後歲餘。延年爲府丞。所訐。下御史按驗。遂棄市。東海莫不稱母賢智。

呂坤曰。天道好生。嚴母明於天道者也。至於仁義教化。全安愚民二語。賢哉嚴嫗。可爲民父母之訓辭矣。

傳稱嚴母五男。皆有吏材。至二千石。東海號曰萬石嚴嫗。蓋欽其母教焉。且觀都亭責子。全安愚民。當以教化爲先。仁也何如。及歸東海。知子不免刑戮。知也何如。而於延年論囚擅殺。流血數里。未能知之。有素誥誠於先。殆千慮一失也。夫延年守郡。所在名嚴能。固能吏矣。世惟能者自伐。致逞兇殘。商鞅論囚而赤渭水。皆此類也。仁如嚴母。智如嚴母。善教如嚴母。猶不免疏於一失。悔恨無及。況仁智不若。母教不施。能吏幹材。不自殺其身也。幾希矣。

【音釋】

屠殺也。○臘。歲終祭神也。○謁。拜見也。○數。上聲。數其罪也。備備位也。願。猶反也。○獨殺。猶言擅殺。自意。自料也。○訐。攻其惡。

也。驗符其罪也。棄市。棄之於市。斬首示衆也。●辭。詞通。●欽。敬也。○自伐。矜其能也。逞。快其欲。不知檢束也。○商鞅。秦相。以殘暴虐民者。○幾。平聲。希。少也。

仁濟軍旅。辛憲英。三國魏時人。羊琇之母也。初鐘會伐蜀。憲英謂其夫之從子羊祜曰。會在事縱恣。非持久處下之道。吾懼其有他志也。會請其子羊琇爲參軍。憲英憂之曰。他日我爲國憂。今難至吾家矣。謂琇曰。行矣戒之。軍旅之間。可以濟者。其惟仁恕乎。後鐘會鄧艾俱誅。琇竟以全歸。

許止淨云。軍旅之間。可以濟者。惟仁恕一語。足爲掌兵者千秋金鑑。所謂質諸鬼神而無疑。百世以俟聖人而不惑者。蓋軍旅本殺伐之事。至凶至惡。運之以仁恕。則轉惡爲善。逢凶化吉。造福莫大焉。老子曰。惟慈以戰則勝。以守則固。天將救之。以慈衛之。辛憲英以一女子而能見及此。其德足以母天下後世。豈僅福庇子孫哉。

【音釋】曹丕。篡漢國號魏。○從子。兄弟之子也。縱恣。放肆也。他志。謂懷異心也。○全歸。全其身以歸也。

孝化頑愚。北魏房景伯母崔氏，嚴明有高節。親授子景伯景光九經，學行修明，並當世名士。景伯爲清河太守，每有疑獄，常先請焉。貝邱婦人列子不孝，吏欲按之。景伯爲之悲傷，入白其母。母曰：小人未知禮教，何足責哉。乃召其母與之對食，使其子倚立堂下。觀景伯供食，未及旬日，悔過求還。崔氏曰：此雖面慚，未知心愧，且置之。凡二十餘日，其子叩頭流血，母涕泣乞還，然後聽之，終以孝聞。

許止淨云：印光法師嘗言：國家教育之權，婦人家操得一大半。有賢母自有賢子，有賢妻自有賢夫。讀房景伯母子傳，信斯言誠不易也。景伯昆弟以深受母教，友於兄弟而一家治，御於家邦而天下治。崔氏佐子出治，不尙齊之以刑，而貴道之以德。其教民也不在革面而在洗心。嗚呼！在上者如此親民，唐虞三代之盛，又何以加哉。而其致治之由，乃出於母教。婦女之責任，不其重歟。今之提倡女權者，專致力於參政，一若

除參政外，對於社會無所盡其職。對於國家無所効其勞者。此正專制政體遺存之陋習。重視政治而輕視教育。而不知教育爲政治之根本。所謂形端而後影直也。又提倡教育者。專一研究科學。無以陶鑄國民。此又震於富強。崇拜科學萬能。致忽於道德。而不知道德實教育之根本。故家庭教育尤重於學校也。試觀房母令部民母子相訟者。觀景伯供食。未旬日而知恥。不市月而洗心。其感化之速爲何如乎。

【音釋】六朝時拓跋氏據中原國號魏稱北魏者對南朝而言也。○並當世名士者足與齊名之意。○按之者按其罪而刑之也。○白啓也。●操平聲執持也。○不易不可更變也。○兄弟相善曰友御治也。語出詩經。○佐左去聲輔助也。尙重也。齊平也。道引也。見論語。○革改除也。○唐虞堯舜有天下之號。三代夏商周也。○震被震驚也。忽忽視不以爲意也。○旬十日而一月。

死獄求生。宋歐陽修母鄭氏家素貧無資。親教修讀書。以荻畫地教修書字。嘗謂曰。汝父嘗夜覽囚冊。屢廢而歎。我問之曰。此死獄也。求其生不得耳。我曰。生可求乎。曰。求其生而不得。則死者與我皆無恨也。矧求而有

得耶。以其有得。則知不求而死者有餘恨矣。夫常求其生。猶失之死。而世常求其死。豈天道哉。修服之終身。以上仁民

求其生而不得。當償之罪也。求而有得罪。不當償也。執法原情。兩盡之矣。孟子曰。民爲貴。君爲輕。歐母。誠子。藹然以仁民爲本。誠固超人一等。宜其世稱賢母。畫荻而教。猶餘事也。

【音釋】

荻。蘆荻。○覽。閱也。○矧。音晒。況也。○則。知不求。言知其可生而不求也。○服。從也。●藹然。和氣所集貌。

廉而有化。田稷相齊。受下吏之金百鎰。以遺其母。母曰。子爲相三年。祿未嘗若是之多也。安所得此。對曰。受之於下。其母曰。吾聞士修身潔己。不爲苟得。竭情盡實。不爲詐行。非義之念。不萌於心。非禮之利。不入於家。故言行若一。而情貌相副。今君設官以待子。厚祿以奉子。而子若是。去忠遠矣。不義之財。非吾財也。不忠之子。非吾子也。子起。田稷慚而出。反其金。自歸罪於宣王。請就誅焉。宣王聞之。賞其母。而舍稷罪。君子謂稷母廉而有

化。詩曰：彼君子兮，不素餐兮。無功而食祿，不爲也。況受金乎。

呂坤曰：婦人性多貪鄙，見財之入也，輒喜。每不問所從來。若田母者，不亦廉乎。夫與子雖貧，無所入矣。

百鎰之金，受於下吏，下吏焉取。取諸民也。貪婪之漸，苛虐之階，可不慎歟。孟子曰：上下交征利，而國危矣。其是之謂乎。

【音釋】稷，音卽，五穀之長。百鎰，二千兩。○苟，得，得非其正也。竭，盡也。詐，僞也。相副，相稱也。○歸罪，自陳其罪也。○舍，捨同。○素空也。餐，食也。●入，納也。●焉，何也。○婪，貪也。漸，循次而進也。階，猶階而升也。○征，取求也。危，殆也。

清恪仕訓 隋鄭善果爲魯郡太守。母崔氏，性賢明，有節操。每善果出聽事，母坐胡牀於障後察之。聞其剖斷合理，則大悅。若妄瞋怒，母則蒙被而泣。善果伏牀前不起。母謂之曰：吾非怒汝，乃愧汝家耳。吾爲汝家婦，獲奉汝先君，在官清恪，未嘗問私，以身徇國。吾望汝副此心。汝年小而孤，吾寡婦耳，有慈無威，使汝不知禮訓，何以負荷忠臣之業乎。汝自童子承襲茅

土位致方伯。豈汝身致之耶。安可不思此事。而妄加瞋怒。心緣驕樂。墮於公政。墜汝家風。以取罪戾。吾死何面目見汝先人於地下乎。母恆自紡績。善果曰。兒封侯開國。秩俸幸足。母何自勤如是耶。答曰。此秩俸是天子報汝先人之徇命也。當散贍六姻。爲先君之惠。妻子柰何獨擅其利。以爲富貴哉。善果歷任州郡。唯內出饌於衙中食之。公廨所供。皆不許受。悉用修治廨宇。及分給僚佐。善果亦由此克己。號爲清吏。

許止淨云。觀鄭母訓子。可謂恩威並至。以秩俸分贍六姻。彰先人之惠。較敬姜專論勞逸興亡。更進一層。有母如此。其子不成賢良。未之有也。子孤母寡。有慈無威。爲世俗通病。溺愛失教。率由於此。觀鄭母所言。得無警省。至其詞發乎情。纏綿悱惻。直可與歐陽公瀧岡阡表。並讀之也。

【音釋】

隋代名。障蔽也。用物蔽之也。察詳察也。瞋讀如真。忿怒而目張也。獲得也。恪敬也。徇與殉通。徇國身死國事也。負

荷擔負也。荷去聲。○襲音習。承先人封爵曰襲。食茅踐土。言封爵受地而食其祿也。方伯猶言一郡之長。卽今之主省政者。○樂與傲同。墮音

惰落也。戾音利。乖謬也。○秩讀如姪。職也。俸祿也。○瞻讀如善。給也。惠恩賜也。擅專也。○饌食也。○靡音解。公署也。○僚佐同官。佐治之人。●彰昭示也。敬姜論勞逸事見後。勞逸與亡節。●纏綿不絕之意。●悱惻悲慘之意。瀧岡阡表。宋歐陽修所撰。其母墓碑。瀧音雙。

好惡消息。唐崔玄暉母盧氏嘗戒玄暉曰。吾聞姨兄辛亥馭云。兒子從官者。有人來云貧乏不自存。此是好消息。若貲貨充足。衣馬輕肥。此是惡消息。吾嘗以爲確論。比見親表中仕宦者。務多財以奉親。而其親不究所從來。但以爲喜。若出乎祿廩可矣。不然。何異盜乎。縱無大咎。獨不內媿於心。汝今爲吏。不能清忠。無以戴天履地。宜識吾意。故玄暉所至以清白名。

以上廉潔

呂坤曰。廉母多矣。未有如崔氏教子之明切也。吾取之以爲仕訓。

許止淨云。盧氏見道之明。愛子之切。足與敬姜並美。其好惡消息兩層。更如暮鼓晨鐘。發人猛省。不惟堪作家規。直可昭示天律。蓋好惡消息。卽吉凶之分途。天人感應。間不容髮。君子趨吉避凶。亦見善如不及。見

不善如探湯可耳。獨是婦人女子能洞然不昧者。而士大夫反瞽瞍無知。以好易惡。去吉蹈凶。豈不怪哉。嗚呼。世風澆漓。每況愈下。仕宦家以錢物奉父母。為盧氏所深斥者。漸亦不多覩。而專以奉權要。事妻妾矣。

【音釋】唐朝代名。曄音偉。○馭音御。貧無財。乏不足也。○贄與資通。賢之意。猛省。頓然覺悟也。○不惟猶言不止。堪可也。律常法也。○間。隙也。間不容髮。言無容髮之隙也。○探平聲。沸湯炙手。誰能以手探之。喻不貌。脊音茂。蹈踐履也。○澆薄也。漓散也。斥音尺。責其罪也。覩音構。見也。○權要。執政者在位者。

賈母明義 王孫賈年十五事齊閔王。國亂閔王見殺。國人不討賊。王孫母謂賈曰。汝朝出而不還。則吾倚門而望。汝暮出而不還。則吾倚閭而望。今汝事王。王出走。汝不知其處。尚可歸乎。賈乃入市中。令百姓曰。淖齒亂國殺王。欲與吾誅之者。右袒。從者四百人。刺淖齒而殺之。君子謂王孫母義而能教。詩云。教誨爾子。式穀似之。此之謂也。

呂坤曰。世之愛子者。多欲保全其身。至見危授命。則深悲而固止之。豈知不義而生。不若成仁而死哉。王孫母以求君望其子。寧失倚門之望焉。賢哉母也。善用愛矣。

【音釋】

閩里門也。○與共也。誅戮也。右袒。露其右臂也。○式。正也。穀祿也。●見危授命。見論語。言能赴難捨生也。

苞母捐軀。趙苞爲遼西太守。迎母就養。道經柳城。值鮮卑入寇。劫質其母。苞悲號告母曰。本欲以微祿奉養。不圖爲母作禍。母遙謂之曰。人各有命。何得相顧。以虧忠義。爾不聞王陵母對漢使伏劍以固子志乎。苞卽時進戰。鮮卑大敗。母遂遇害。苞嘔血而死。

傳載苞母爲鮮卑劫去後。卽載之以攻遼西郡。是則趙苞守土之重。較王陵未定君臣之分者。尙有進焉。陵固可歸楚逃漢。終身匹夫。以全母生。苞卽欲若是而不可得也。惟苞母知其然。故遙勉以忠義。慷慨待死。以全其子。共城存亡之責。其用心與周遇吉母麾子出戰。事同一轍。而

後先輝映焉。

【音釋】鮮卑北方種族名。質音至。劫質強掠以爲抵押也。○不圖非所料也。○嘔吐也。●明周遇吉總鎮代州守寧武關。李自成攻之。

兵盡食絕。救兵不至。知難免。歸別母。其母固賢者。揮之出戰。被叢矢死。舉家自焚。事載第一集。不重錄。王陵母事見後。陵母知興節。

勛子及孫。晉虞潭母孫氏。守節撫孤。潭爲南康守。率眾討杜弢。母勉以忠義。傾資產以饗戰士。後征蘇峻。母戒之曰。吾聞忠臣出孝子之門。汝當舍生取義。勿以吾老爲累。盡發家僮助戰。售服飾爲軍資。遣孫楚潭子從。征務盡忠孝。潭後以功封侯。母年九十五始卒。諡曰定夫人。

虞母固非苟安好貨之庸婦。舍生取義。紓難毀家。賢者當如是也。然至罄飾物。驅家僮。勛子以及孫。其孤詣苦心。愈不可及矣。若此而不足鼓勵士氣。抵禦叛逆者。未之有也。傳曰。明恥教戰。不圖巾幗中而有斯人焉。

【音釋】晉朝代名。撫。撫育也。○弢。音韜。○饗。食之也。

冀盡言責。唐王義方官侍御史。以宰官李義府恃恩放恣。將彈之。告母曰。奸臣當道。懷祿而曠官。不忠。老母在堂。犯難以危身。不孝。進退惶惑。不知所從。母曰。王陵母殺身成子之義。汝若事君盡忠。立名千載。吾死不恨。義方遂彈之。高宗以爲毀辱大臣。貶萊州司戶。●宋劉安世初除諫官。白母曰。朝廷不以兒爲不肖。使居言路。如有觸忤。禍譴立至。若以母老辭。當可免。母曰。不然。吾聞諫官爲天子諍臣。汝父平生欲爲之而不得。汝幸居此職。當捐身以報國恩。使得罪流放。無問遠近。吾當從汝所之。安世受命。正色立朝。面折廷爭。人目之爲殿上虎。以上教子忠義

居官貴能盡職。諫官以言爲職責。去讒遠佞。繫天下安危。安世之父欲爲之而弗得。安世幸得之矣。正宜面折廷爭。以身許國。義方更居之有素。知宰官之放恣矣。尤應不憚權勢。訐犯顏。清君側。而盡厥職。何惶惑之有耶。賢哉二母。明義以教。毋使爲念。耿耿此心。自可昭垂千古。

【音釋】

曠官侍御史官名司言諫之職○彈劾也諫官檢舉過惡曰彈劾○

惑疑而難決也○貶降職也司戶主戶民之官●除拜官也○觸忤犯

上之意譴音遣責也立即也○諍爭去聲以言力爭故曰諍臣○流放

犯罪至徙流放逐也之往也○面折面斥其非廷爭爭之於朝也●讒

音慚毀善害能也○憚畏懼也訐攻其惡也清君側言肅清人君左右

之邪僻也○耿耿光也昭垂昭明而垂示後世也

勞逸興亡 魯季敬姜季文伯之母也文伯相魯退朝敬姜方績文伯曰

此歎音出文之家而主猶績懼于季孫之怒其以歎不能事主乎敬姜歎

曰魯其亡乎使童子備官而未之聞耶居我語汝昔聖王之於民也擇瘠

以處之勞而用之故長王天下夫民勞則思思則善心生逸則淫淫則忘

善忘善則惡心生沃土之民不材淫也瘠土之民向義勞也是故天子諸

侯王后夫人莫不旦暮憂勤各修其職業今我寡也爾又在下位朝夕度

事猶恐忘先人之業況敢怠耶

呂叔簡稱敬姜之內教備矣無一而不善可為婦人持身之法夫敬姜

之德。豈僅爲婦人持身之法已哉。卽其勞逸之論。慮深識遠。至理名言。已足互萬古而不磨。雖賢士大夫。猶有未能言之行之者。況愚夫愚婦乎。語云。女子無才便是德。此指庸德庸行而言。以爲小有才未聞道者戒耳。若夫明大義。知大體。處變決疑。究以才識爲先。視士大夫奚有異耶。

【音釋】

周公之子伯禽。封於魯。季氏。敬姜。其謚也。○績。紡織也。○季孫

○居。止也。語去聲。音遇。告之也。○瘠。音即。瘦也。處之。居之也。王。音旺。言以德而有天下也。○沃。音渥。肥也。不材。音不成材也。○虔。敬也。忘。懈也。○內教。猶言家教。○互。音耿。徧也。

菽粒同甘。楚將子發。攻秦絕糧。使人請於王。因使問母。母問使者曰。士卒無恙乎。對曰。分菽粒而食之。又問將軍無恙乎。對曰。朝夕芻豢。子發破秦而歸。其母閉門不納。使人數之曰。勾踐伐吳。客有獻醇酒一器。王使人注江上流。使士卒下流飲之。味不加美。而士卒戰自五也。異日有獻一囊

糗糲者。王又以賜軍士。分而食之。甘不踰噍。而士卒戰自十也。今子爲將。士卒分菽粒。而子獨芻豢。雖幸而勝。非其術矣。子非吾子也。無入吾門。子發叩首謝罪。然後納之。

呂坤曰。子發之母善教子發哉。今之爲子發者。滔滔也。不獨士卒分菽粒。又從而剝削之矣。不獨己食芻豢。又充溢於囊橐。狼戾於苞苴。噫。豈獨爲將。何足責哉。讀此可愧也夫。

【音釋】楚。周諸侯之國。攻。擊之也。秦。亦當時諸侯之國。使者。奉使命之人。○恙。疾苦也。○菽。豆也。○芻豢。羊豕之屬。蓋言食肉也。○勾踐。越王。周末賢明之諸侯。醇。音淳。美酒。○糗糲。音臭。備乾飯也。踰。過也。噍。與咽通。戰。自五。自十。言以一當五。當十也。●滔滔。水多貌。音叨。滔滔者。天下皆是也。見論語。○剝。音駁。亦削也。○充溢。滿足也。囊橐。所以貯物。言自私也。狼戾。暴殄之意。苞苴。所以裹牛羊之肉。言在上者。自私自利。暴殄。下民不能聊生。憂歎。下世其旨深矣。

嬰母度德。陳嬰爲東陽令。得民。秦二世時。東陽少年相聚數千人。欲立嬰爲王。嬰母曰。我爲爾家婦。聞爾先人。不甚貴。今暴得大名。不祥。不如有

所屬事成猶得封侯。敗則易亡匿。無爲人所指名也。嬰從其言。以兵屬項梁。梁以爲上柱國。後歸漢。以功封唐邑侯。君子曰。嬰母知天命。又能守先故之業。流祚後世。謀慮深矣。

貪一時勢位。不自度德量力。往往不得善終。嬰母所見。不但以益其子。且足爲天下後世銳進與戀棧者鑒焉。夫豈徒慕虛榮而不顧其後者。所可同日語哉。今之割據稱雄。倒戈反動之輩。倘三復嬰母暴得大名之言。又何致炮火轟隆。此仆彼繼。而令生靈塗炭耶。至歷來忠義之士。任大責重。見危授命。臨難不圖苟免。斯又情異勢殊。未可執此以論也。

【音釋】二世。秦始皇子。名胡亥。○暴。忽然之意。○屬。隸屬也。亡。逃也。匿。藏也。○項梁。項羽之叔。上柱國。官名。○故。舊也。祚。福祚也。●銳。速也。銳進。言速於求進也。老馬戀棧。喻人

之貪戀祿位。不肯捨去也。○殊。不同也。

陵母知興。漢王陵始爲縣豪。高祖微時。兄事陵。及高祖起沛。陵亦聚眾數千。以兵屬漢王。項羽與漢爲敵國。得陵母置軍中。陵使至。則東嚮坐。陵

母欲以招陵。陵母私送使者泣曰。爲老妾語陵。善事漢王。漢王長者。無以老妾故懷二心。言妾已死也。乃伏劍而死。項羽怒烹之。陵終與高祖定天下。位至丞相封侯。傳爵五世。君子謂王陵母能棄身以成其子矣。

陵母勇於殺身。以成子之功名。其賢固不可及。然使昧於知人。亦等匹夫匹婦爲諒自經溝瀆者耳。況楚漢之爭。高祖屢挫其鋒。以勢以力。皆遠不逮項氏。斯時勝負之數。非得佛氏宿命通者。未能定之於先也。惟母知漢王長者。恢宏大度。故以一死堅子志。是其知興之智。固由於知人之明。獨怪夫陵也。一日聞母在楚軍。當食。一日不下咽。寢。一日不帖席。卽暫歸楚以全母。可也。後逃楚以歸漢。可也。吾母得生。卽終身匹夫。可也。何忍母之見拘。而甘心以赴功名之會乎。叔簡呂氏謂陵母之死。陵未及知。斯則曲爲陵恕。非定論也。觀夫陵使至楚。可知羽得陵母。非一日矣。陵既不肯赴楚。忍令母陷敵軍而不之救。終必致死。無待龜著。

雖然分我杯羹。高祖尙忍言之。陵也何足責哉。

【音釋】

縣豪言爲一縣之英豪。○微時貧賤未得志時也。○嚮同向。招致之也。羽欲陵附己。故執其母欲招致之。●諒小信經自縊而

死也。言匹夫匹婦徒守小信。自填溝瀆。此語見論語。○宿命通。佛經通有六種天眼。天耳。他心。宿命。神足。漏盡。其一也。行者功到業盡。情忘得宿命通。能知過去未來事。○恕。恕其罪也。○龜著。用以卜卦。言其母致死。不卜而能知也。○項羽。得高祖之父。太公。置軍前。高祖謂之曰。吾翁。即若翁。必欲烹而翁。幸分我一杯羹。若而二字。皆作汝字解。蓋高祖初與羽同事。義帝故有吾翁。即若翁之言。義帝係羣雄初起所立。故楚國。後復被羽殺。

責子定軍。唐李景讓母鄭氏。治家最嚴。景讓爲浙西觀察使。嘗怒牙將

殺之。軍中謀變。母召景讓廷責曰。爾鎮撫方面。而輕用刑。豈惟上負朝廷。使垂年之母。何面目見汝先人乎。命左右去其衣。將撻之。將佐爲之請。不許。固請。乃釋之。一軍遂定。方景讓幼孤。母自教訓。宅後牆陷。得錢盈甌。母焚香祝之曰。妾聞不勞而獲。身之災也。惟願諸孤學問有成。乃其志也。此不敢取。掩而築之。後三子皆舉進士。

呂坤曰。鄭氏以教子之功。定不測之變。財非不義。且棄而不取焉。大丈夫行有加於是乎。宜三子之皆爲名士也。

許止淨云。淮南子曰。掘藏之家。其後必亡。戰國策云。家有不肖之財。則傷。然歷史所載。得藏金不取者。只有管幼安。至華歆已有媿色。何意鄭氏有如是懷抱。不取覆藏。而願諸子學問有成。見識何等遠大。厥後竟得如願相償。可見天不負人矣。大抵父母之教子女宜嚴。而見識尤宜遠大。惟母氏多偏於姑息。又短於見識。寡婦尤甚。此中貽誤人子不少。卓哉鄭母。子雖貴且老。有過不貸。眞所謂大慈也。其不勞而獲。爲身災之言。豈僅一家法則。實天下後世之準繩。今人心理總思不勞而獲。所以掠奪之風。徧於天下也。而困苦流離者。亦以之日眾也。

【音釋】牙將偏卑之屬。○廷責。責於中廷。俾衆見之也。鎮守也。撫安綏也。垂年垂暮之年。○撻。答擊也。○盈滿也。颯音岡。大瓮也。祝禱告也。●不測之變。指軍中謀叛。禍不可測也。●淮南子。戰國策。皆書名。不宜之財。謂不當得而得也。傷害也。○三國志載。管寧與華歆友善。管

鋤園得金。寧不顧。欲捉而擲之。蓋優劣遂分矣。按。欲擲金不取。已爲難得。然較寧之視。猶未見不免有慚色矣。幼安管寧之字。○懷抱言胸中所懷。美其志與識也。○卓卓絕不羣也。不貸不恕其罪也。大慈言以嚴教子。以成其德。較平常慈母所見大也。○準取其平。繩取其直。皆言可取法也。

警惕爲君。宋太祖卽位。拜杜太后於堂上。眾皆賀。太后愀然不樂。曰。吾聞爲君難。天子置身兆庶之上。得其道則此位可尊。苟或失敗。求爲匹夫不可得。是吾所以憂也。太祖再拜曰。謹受教。以上賢智。

求爲匹夫不可得一語。足使哀哀王孫掩卷而泣。居上位者。宜本在上不驕。高而不危之旨。兢兢自勵。並誠其子孫。庶可挽救於萬一。若今之未富而奢。未貴而驕者。宜其不旋踵而無噍類也。觀此能無有動於中乎。

【音釋】愀音悄。愀然容色變也。○兆庶猶言眾民。匹夫賤者之稱。●哀旋踵言其速也。噍音諂。嚼也。無噍類言無復有活而噍食也。○動於中言中心感動也。

誠交損友。魯文伯之父穆伯先死。母敬姜守志。博達知禮。文伯出學而還。敬姜側目盼之。見其友上堂而從後。降階而却行。奉劍而正履。若事父兄。文伯自以爲成人矣。敬姜召而數之曰。昔者桓公坐友三人。諫臣五人。日舉過者三十人。故能成霸業。周公一食三吐哺。一沐三握髮。執贄而見於窮閭隘巷者七十餘人。故能成周室。今子年少位卑。而所與遊皆爲服役。子之不益亦已明矣。文伯謝罪。乃擇嚴師益友而事之。

士首尙乎氣節。無故能下人者。皆讒諂面諛之人也。與讒諂面諛之人居。則過無所聞。而必自以爲是矣。啓驕恣之心。萌狂妄之念。尙期其磨礪切磋。進德修業耶。敬姜鑑微知著。誠子之言。誠足爲千古處友之法。嘗見今之富室子弟。失於教者十之三。誤於友者十之七。初則放縱自矜。卒致身敗名裂。爲世所不齒者。皆敬姜所謂與遊服役之徒。有以致之也。可不慎哉。

【音釋】

側目不正其目也。盼音係。恨視貌。○却行退讓。隨行之意。○日

公春秋時五霸之一。○周公文王子武王弟。輔成王。有聖德。三吐哺。三握髮。言接見賢士之殷。不待飲食沐浴。既畢而吐哺握髮以迎。至於再三也。執持也。贊音志。拜見之禮。窮閭隘巷。言荒野窮困之區。隱士所居。周公往見。請益也。闕里門隘狹窄也。○不益無所受益也。●佞言曰諂。面從曰諛。○磨礪切磋。喻研究學問。如刀之磨礪。玉之切磋焉。○微者少見其端。著則已顯明矣。處友言與友相處之道也。○裂敗壞之意。不齒。不屑掛齒也。

使結勝己。晉陶侃母湛氏。生侃而貧。每紡績資給之。使結勝己者。賓至

輒款延不厭。一日大雪。鄱陽孝廉范逵宿焉。母乃徹所臥新薦。自剉給其馬。又密截髮賣。以供餼。逵聞之。歎曰。非此母不生此子。侃後爲潯陽縣吏。監魚梁。以一缶鮓遺母。母封還。以書責侃曰。爾爲吏不廉。是吾憂也。

呂坤曰。余讀詩。見鷄鳴婦人。欲成夫德。至解雜佩。陶母愛子。剉薦斷髮。以延客。不更切哉。子也何以慰母心。友也何以答母意乎。世之好客如陶母者誠稀。而號稱契知者。果能益人之子。足以當陶母之情否耶。我

欲爲之流涕。

【音釋】侃音愷。洪音斬。○結交納也。○款延接而待之也。○徹同撤。除也。薦獸所食草。可編臥具。剉音銼。截斷也。○殺音者。饋音撰。○監平聲。音問守也。缶音否。瓦器。●鷄鳴詩經篇名。解除也。佩環珮之屬。○稀少也。契相投也。

親賢遠佞。包蒙泉爲御史。其母戒曰。汝爲天子耳目官。須廉以持身。激濁揚清。方盡厥職。泉遵母訓。廉介清謹。不畏強暴。聲震朝野。天下賢之。其弟子敬亦官御史。在家宴客。母問僕所宴何人。僕曰某。又問言何事。曰言買某氏女爲妾。母大怒。急呼子敬至。責之曰。某氏子諂佞小人也。不親賢人君子而親此輩。不談經史道德而談買妾。吾不忍見爾敗壞家聲。終日不與言。子敬懼。跪而請罪。母曰。必絕某氏子。不許往來。方恕汝罪。子敬諾。自此改過。品行益端。

包氏母教素嚴。子敬固亦賢士。而其母猶惴惴於諂諛之近。必使絕之。而後已。況年少之人。心性未定。智識未廣。則薰漬陶染。暗化潛移。尤不

可不懷若履霜之漸。冰淵之戒矣。語云。與善人居。如入芝蘭之室。久而自芳。與惡人居。如入鮑魚之肆。久而自臭。孔子無友不如己。墨子興悲於染絲。皆此之謂。是故君子必慎其交遊焉。

【音釋】耳目官。言御史負言諫之責。猶君之耳目也。濁。水不清也。激。防深也。○肆。市廛。○墨。子見染絲而悲。以色之所加。即易其潔白耳。此亦喻人之爲惡爲善。如絲隨染而色變也。

毋事臧否。吳賀母謝氏。每賀與賓客語。輒於屏間竊聽之。一日賀言人長短。謝聞之怒。笞賀一百。或曰。臧否士之常。而笞之若是。謝曰。愛其女者。當求三復白圭之士妻之。今獨產一子。使知義命。而出語忘親。豈可久之道哉。因泣不食。賀恐懼。自是謹默。以上戒子慎交。

馬援誡兄子書。好議論人長短。此吾所大惡也。寧死不願子孫有此行也。蓋以直訐醜詆。招怨致尤。亡身之禍。言居其九。特深惡而痛絕之。韓退之謂怠者不能修。忌者畏人修。致責人也。詳待己也。廉。故臧否士類。

非明哲保身之道。亦非君子修己之方。吳母怒答其子。並引三復白圭以明之。是兼馬韓二公之識。豈尋常巾幗所能語其萬一哉。

【音釋】

臧善也。否音鄙。否也。言論人之善否也。○三復白圭。見論語。孔子以兄之子妻南容。以容能三復其身。如白圭之無玷焉。圭以

玉爲之。古以封諸侯。○諱默。謂慎默。寡言也。●馬援。漢光武時名臣。稱伏波將軍。○計攻人惡也。訶斥人非也。○退之。即韓愈。責人待己數語。

見韓文原毀篇。○巾幗。女子所戴。故以爲喻。

咀嚙熊丸 唐柳仲郢母相國韓休之孫女也。善訓子。嘗和熊丸。使夜咀

嚙以助勤。治家嚴肅。儉約。斥綾羅錦繡不御。子孫皆官於朝。世以孝弟禮法爲士大夫所宗。其家訓曰。凡門第高。可畏不可恃也。立身行己。一事有失。則得罪過他人。死無以見先人於地下。此其所以可畏也。門高則驕心易生。族盛則爲人所疾。懿行實材。人未之信。小有疵類。眾皆指之。此其所以不可恃也。故凡膏粱子弟。學宜加勤。行宜加厲。僅得比於他人耳。

許止淨云。柳氏家訓。名高唐代。而實發原於母教。孟子云。生於憂患。死

於安樂。楊子云。炎炎者滅。隆隆者絕。高明之家。鬼瞰其室。聖賢誨人。千古一揆。而不肖子弟以其不便於己。反疵古人爲迂腐。而惟邪說詖行。是尙。驕奢淫佚。日演彌厲。不至敗家亡身不止。願世有賢父兄。嚴訂禮法。採集道德倫理之訓。日夕而熏陶之。俾穆柳家風。復現於今日。不惟一家之福。亦天下後世之利也。

【音釋】

嘔。咽通。熊膽。汁苦。和丸。咀。咽。使習勤苦之意。○斥。屏斥也。御服。

富室。食則膏粱。故以爲喻。厲。猶甚也。○穆。穆寧。唐之名臣。嘗撰家訓。戒諸子。○窺伺也。○揆。則度也。○穆。穆寧。唐之名臣。嘗撰家訓。戒諸子。

不忘貧賤。唐劉元佐爲宣武節度使。有威略。其母月織絹一匹。以示不忘本。謂元佐曰。汝本寒微。天子富貴汝至此。必以死報。故元佐終身不失節。●韓蓮峯母張夫人。治家嚴正。蓮峯爲刑部郎。妻閻氏亦受封矣。夫人命與嫂同負汲。蓮峯歸見之。令兩隸人代。夫人怒。以杖指之責曰。汝有隸可代。無則不飲水耶。蓮峯笑曰。新婦身強有力。豈不堪負。嫂羸弱且有妊。

是以代之。夫人怒乃解。

許止淨云。唐之衰。藩鎮跋扈。元佐苟無賢母。安知不與劉闢李錡吳元濟比肩。母教之關係。不亦鉅乎。

劉韓二母。居富貴不忘貧賤。斯得持盈之道。士爲知己者死。豫讓國士之報。忠主者必當如是。劉母之教。言盡其旨矣。

【音釋】

節度使。唐代官名。鎮撫一方。掌重兵。唐末藩鎮之禍。皆節度使割據抗命爲之也。○寒寒素微微賤。●隸僕隸。○羸瘦也。●跋

扈。猶言強梁。劉闢李錡等。皆唐末藩鎮之背叛者。●豫讓。戰國時人。嘗爲智伯復仇。曰。國士待我。國士報之。蓋言旣得人主知遇。以國士視我。則應盡國士所當爲。以答知己耳。

教子成名 明鮑氏。歛人許立德之妻。相國文穆公之媳也。年二十四。立德亡。氏自經者再。爲保姆救蘇。又絕粒六日。文穆公從容諭之曰。死節易。撫孤難。汝捨難而就易。豈丈夫志乎。且有孤不撫。他日有何面目對先人於地下也。氏於言下悔悟。不復自殺。知死無濟於身前。反遺憾於身後。遂

毀形儀。清齋事佛。儉衣節食。調恤孤寒。撫孤稍長。教以論語孝經。兼示綱常立身之道。於起居處導以禮義。後竟成大名。

俗云。教子嬰孩。教婦新來。至論也。人小時。恆近於母。行止起居。一言一句。易灌輸於小兒腦海。故母教爲至要也。三綱。卽君爲臣綱。父爲子綱。夫爲婦綱。五常。卽仁義禮智信。仁者不殺。凡有命動物。同爲天地所育。皆當愛護。寧得弱肉強噬乎。義者不盜。凡物有主。不與不取。一莖一粟。毋得妄爲。昔人不飲盜泉。其他可知。禮者不姪。姪謂邪姪。傷風敗俗。無過此也。智者不妄。妄謂妄爲。故君子安貧。達人知命。簞食瓢飲者。人多企敬焉。信者誠實性之德也。人無信不立。物無信不舉。丈夫處世。不可一日無信也。人能盡三綱。備五常。則世界上堪望太平矣。現代民主政治。雖無君臣之分。而上下之間。仍有當盡者在也。而鮑氏教子。能見及此。不亦懿哉。

【音釋】

保姆。撫育子女之婦人。○滅。舍去聲。恨也。清齋。事佛。清齋。謂茹素戒葷也。事佛。謂奉佛也。佛願慈悲。救諸苦難。一切物命。皆所

憐惜故奉佛而茹素者無不蒙其佑護也。噫音誓齧也。○箠食瓢飲論語一箠食一瓢飲在陋巷人不堪其憂回也不改其樂今以謂居貧處約者之辭。

以禮治家 明顏從仕母游氏端莊誠恪克勤克儉督諸子學無間昕夕諸婦晨起必整容問安否稍懶即以禮導之諸子遇母垂詢正襟以對無敢或慢同室數百指平居不聞人聲里黨則焉以上治家有法

蔡六龍云易曰家人有嚴君焉父母之謂也母何以稱嚴蓋母不嚴則婦子嘻嘻違言禮節必父母俱嚴內外齊肅然後父子兄弟夫婦之間各盡其道而家道以正游氏治家以禮殆深明易理歟。

【音釋】督監察也問音潤斷也昕音欣朝也○垂詢下問也正襟肅其衣帶也○指計人口之數也里二十五家黨五百家皆古制也則效法也●噱戲笑而樂也

第二章 婦道

近世青年男女侈談戀愛競尙自由習奢縱慕虛榮一時偶合遂賦同

居。一事乖違。卽云離異。婚姻視同兒戲。居室儼如逆旅。情愛出於苟且。行爲無異娼妓。廉恥盡喪。夫婦道弛。禮教之堤防。固已摧毀無餘矣。且夫婦爲人倫之本。家室之基。嘗見始戀終隙。影響於美滿家庭。人生幸福者。不知凡幾。其害誠有甚於洪水猛獸。爰取古昔守禮安貧之賢婦。列於此章。以示世人。俾資警省。

缺妻敬饁 晉冀邑人郤缺。夫婦相敬如賓客。一日缺耨。其妻饁持飧奉夫。甚謹。缺亦斂容受之。晉大夫臼季過而見之。載以歸。言諸文公曰。敬德之聚也。能敬必有德。德能治民。君請用之。文公以爲大夫。

呂坤曰。夫婦非疏遠之人。田野非几席之地。饁餉非獻酬之時。郤缺夫婦敬以相將。觀者欣慕焉。則事事有容。在在不苟。可知矣。余嘗謂閨門之內。離一禮字不得。而夫妻反目。則不以禮節之故也。郤缺夫婦真可師哉。

【音釋】

男女居室人之大倫同居言夫婦相處也。○喪失也。弛廢也。○爰因也。資助也。●邵音隙古姓氏缺其名也。○耨乃豆切讀如

餒。耘也。餽音葉送飯也。泠同餐食也。斂容敬肅貌。●獻酬言飲宴賓客欣喜也。慕羨慕苟苟且。○反目而視言相怨也。節制也。

鴻光舉案 梁鴻妻孟光肥醜而黑德行甚修鄉里多求者光輒不肯行。

年三十父母問所欲對曰欲節操如梁鴻者時鴻未娶世家多願妻之亦不許聞孟光語遂求之光盛飾入門七日而禮不成光乃更麗衣椎髻而前。鴻喜曰是吾妻也。字之曰德曜。遂同適吳爲人賃舂。每歸孟光具食進必舉案齊眉不敢正視。

孟光之於梁鴻同意而匹配也。以德相求一不棄其貧一不厭其醜。豈若今之談自由戀愛者專以財色相尙耶。況光三十不肯行。鴻則願妻多不許其選配審慎。又豈若今之苟且結合哉。惟其慎之於始自能相偕終老。故千古傳爲美談。亦世之擇偶者最佳模範也。

【音釋】

不肯行不從嫁也。○所欲所欲婚者。○節操節氣操行也。○妻去聲爲之妻也。○盛飾美其衣飾也。禮不成卽不同床席之意。

○更音庚。換也。饀同粗。婦人束髮曰髻。○適往也。質音任。傭也。春音會。以杵擊臼也。○案食盤。齊眉高舉與眉相齊也。●尙重也。○審詳察也。慎謹慎。○模規模。範式也。皆言取法之意。

提甕挽車。漢鮑宣妻桓氏。字少君。宣嘗就少君父學。父奇其清苦。以少君妻之。資裝甚盛。宣不悅。曰：少君生富驕。習美飾。而吾實貧賤。不敢當。少君曰：大人以先生修德守約。故使妾侍執巾櫛。既承奉君子。唯命是從。宣笑曰：能如是。是吾志也。少君乃悉歸侍御服飾。更著短布裳。與宣共輓鹿車。歸鄉里。拜姑禮畢。提甕出汲。修行婦道。鄉邦稱之。

少君易富安貧。輓車提甕。呂叔簡稱其勇於爲義。信然。竊思今之女子。繼承遺產。斤斤爭訟。利資而忘手足者。誠可慨也。蓋觀感於少君之歸侍御服飾焉。

【音釋】裝衣裝。匱飾之屬。○大人指其父。先生指鮑宣也。約儉約。侍奉侍。櫛音接。以木爲之。而有齒。用以理髮。即今日之梳篦。○君子亦指宣而言。○歸返還也。侍御僕從之屬。上服爲衣。下服爲裳。輓同挽。以手引之也。●斤斤明察之貌。手足喻兄弟姊妹。蓋指同胞之意。○盡

何不也。觀者目之所視。感者心之所動也。

庾妻散財。晉庾衮妻荀氏。繼妻樂氏。皆宦族富室。及適衮。俱棄華麗。散資財。與衮共安貧苦。相敬如賓。撫諸孤以慈。奉寡嫂以仁。使長者忘其寡。幼者忘其孤。孤甥郭秀。比之子女。衣食必先之。以上安貧相敬

庾氏兩妻。以富女而為貧婦。能散財撫恤。不凌貧弱。賢也何如。今人處庾妻之境者。不但挾富貴。傲視族黨鄰里。且將驕其夫。而並慢其翁姑。早離異自由去矣。可勝嘆哉。

【音釋】晉朝代名。庾音余。姓也。衮音滾。人名也。○適猶嫁也。棄音器。捐也。●凌欺虐也。○慢我慢謂怠視也。○勝音升。不已之意。

善為夫謀。羊叔姬者。羊舌子之妻。叔向名叔魚名母也。羊舌子好正。不容於晉。去而之三室之邑。三室邑人相與攘羊而遺之。羊舌子不受。叔姬曰。夫子居晉不容。去之三室之邑。又不容。不如受。羊舌子受之。將為子享之。叔姬曰。不可。胥與鮒童子也。隨大人而化。不可食以不義之肉。不若埋

之。於是乃盛以甕，埋壚陰。後二年，攘羊事發。吏至，羊舌子曰：「吾受之，不敢食也。」發而視之，羊舌尚存。吏曰：「君子哉！羊舌子不與攘羊之事矣。」

勸受攘羊，能達權也。不以食子能輔正也。埋之壚陰，能遠禍也。君子之立身處世，不外通權達變，居正守常耳。婦人而具是識，而以是相其夫，可不謂賢乎？

【音釋】

三室之邑，邑之小者也。○攘，竊也。遺，餽也。○享之，食之也。○壚，竈也。○與，入聲。不與，不相涉也。

勤苦助廉。晉吳隱之，自幼清介，有孝行。及爲官，妻紡績以供朝夕。負薪爲炊，冬月無被，以草薦自裹。當浣衣被，著也其絮曬乾，復縫之。勤苦同於士庶。或謂其太過。婦曰：「吾夫居官廉潔，所得俸錢，贍族濟民，需用甚鉅。吾特以勤苦助其廉耳。」

晏子一狐裘三十年，而寒士待其舉火者數百人。夫以廉潔之吏，而猶贍族濟民，誠不易得。隱之之妻安於勤苦，助夫之廉，佐夫之仁，以成夫

之志。若斯內助。能有幾人。今之居官者。以俸給所入。供妻妾揮霍而不足。更將敲剝愚民。而予取予求焉。視此得無少愧於心乎。

【音釋】裹。音果。包也。○浣。洗也。絮。棉絮。○土庶。眾民也。○贍。調助也。●裘。皮衣。○佐。輔助也。○敲。剝虐取也。予取予求。言逞己之所欲也。

仰事俯畜

宋周謂以布衣謁藝祖。

卽宋太祖

見信奔走嶺塞。不得歸者二十

六年。家素貧。妻莫氏。性貞靜。事舅姑。躬蠶織。閨門肅然。及二子長成。築外室。延師。寒暑肄業無間。晚年產漸厚。乃爲舅姑營美邸。作壽坎。松檟茂密。皆自手植。又爲夫營別墅。水竹交映。亭閣相望。子女皆婚嫁望族。夫在官亦修高節。歸已皓首。因勸致仕。偕老林泉。以上內助賢能

謂以勞於王事。不得仰事父母。俯畜妻子。幸內助賢能。婦賢而兼子職。母也而執父教。勤以治家。儉以率下。卒致閨門肅穆。家產豐饒。作壽坎爲翁姑首邱之計。營別墅爲夫子終老之謀。二十六年間。使謂無內顧

之憂。此爲婦者之最佳模範。擬以夏后塗山。又何愧焉。

【音釋】

也。謁拜見也。○塞邊塞。○坎穴也。○禱音賈。松楸之屬。茂密林木。盛貌。植。

栽種也。○墅音署。上聲。別館也。○皓首老年白髮也。●畜養也。○肅敬也。穆和也。饒餘也。○首邱故鄉葬地也。○擬比擬塗山氏夏禹之妃啓之母也。禹治洪水。三過其門而不入。塗山氏獨明教訓。以成啓之賢。

勵志養姑 陳孝婦者。漢時淮陽人也。甫嫁而夫當戍。將行。屬孝婦曰。我

生。死未可知。有老母。無他兄弟。備養。吾不還。汝肯養吾母乎。婦應曰。諾。夫果死不還。婦無子。養姑紡績以爲業。居喪三年。其母將取而嫁之。婦曰。妾聞信者人之幹也。義者行之節也。夫行屬妾以母。既諾之矣。豈可棄哉。棄託不信。背死不義。母百計勸之。婦曰。生子而娶之婦。非以託此身乎。姑老矣。夫不幸。不得終爲子。而妾又棄之。是負夫之心。而傷妾之行也。養姑二十年。姑死。終奉祭祀。太守以聞。文帝高其義。賜黃金四十斤。復其家。號曰孝婦。

呂坤曰。孝婦夫亡時。年僅十八耳。別時一諾。持以終身。既守婦節。又盡子道。艱苦幾經。不二其心。設非孝婦。母也不爲溝壑之枯骨乎。古制孤子不從軍。文帝漢英君。仁心宜無不及。而絕人之嗣。寡人之妻。獨人之母。豈非德政之累哉。

【音釋】戍音恕。守邊也。○屬卽囑咐也。○諾應許也。○幹木本也。○背違背。○負孤負。○復除其役也。●不二言其志之專一也。○壑坑也。

勢不兩全 周迪。洪州商人。攜妻之揚州。唐末。楊行密圍揚州。掠劫已盡。軍士食乏。市肆殺人賣肉。迪妻曰。窮蹙如此。勢不兩全。君有老母。不可不歸。請賣妾以備行資。遂自詣屠肆。得白金與迪。迪袖以行。門者詰之。迪告其故。不信。還至屠肆驗實。妻之首已在案上矣。眾悲歎。以帛遺迪。收骸骨而歸。

亂世饑荒。至於殺人賣肉。固浩劫也。然浩劫之釀成。皆由於兇狠殘忍。

之徒。無仁慈惻隱之心。戕賊物類。荼毒生靈。遂干上天之怒。致獲天譴耳。迪妻自詣屠肆。犧牲一己之血肉。以全其夫之孝行。此豈常人之行爲哉。且以此至悲至慘之行爲。使有目不忍卒覩。有耳不忍卒聞。正足以回頑惡之心。挽濁世之劫。斯不啻現身說法。其功亦至偉矣。

【音釋】

掠奪也。○蹙迫也。○詰追問也。●惻隱仁人不忍之心也。戕賊殺害也。干犯也。譴罪責也。○偉大也。

奉姑遠戍。夫人宋氏。宋濂族女也。夫衢州人。爲閩州守。坐累死。家人遣戍金齒衛。氏奉姑以行。至常德。題詩郵壁。太祖聞而釋之。賜以閩守之祿。今雲南永昌城西有節孝碑。都御史王中題其陰。祠則御史陰汝兆所建也。

詩曰。眼前有子相親傍。身安且不憂家蕩。如今子死親年高。縱到雲南有何望。此其哭子之詞。悽惋爲何如耶。上山險如登雲梯。百戶發放來取齊。雲暗雨滑把姑手。一步一仆身沾泥。此其征行之詞。艱苦爲何如

耶。妾心汪汪淡如水。寧受飢寒不受恥。幾回欲葬江魚腹。姑存未敢先求死。孝思須體夫懸戀。當學慈烏終養膳。姑亡妾亦隨姑亡。地下何慚見夫面。此其明恥見志。不匱孝思之詞。足令聞者酸心。讀者流涕。當此風俗頹敗。綱常盡廢之時。淫蕩背逆之徒。幾不知有這種人。不識有這種事。錄之以爲世勸。

【音釋】

宋濂明初名臣。○衢州今屬浙江。閩音浪地名。屬今之四川。金齒衛在雲南。○常德屬湖南。郵驛亭也。

鄭徐雍睦 宋張孟仁妻鄭妙安。孟義妻徐妙圓。徐母家富。鄭貧。徐不驕。鄭不諂。共居一室紡績。寸絲不入私房。家有遺送。必納舅姑處。欲用則請之。不問孰爲己物。鄭歸寧。徐母其子。徐歸。鄭亦如之。不問孰爲己子。子亦不知孰爲己母。家貓爲人竊去。犬哺其兒。人皆謂和氣所感。太宗時。旨表其門曰二難。

諂媚取容。驕矜傲物。處貧富之境者。俱所難免。唯其傲物。必致不能容。

物。唯其取容。更將無以自容。家庭妯娌之間。苟以驕諂相與。安有融融緝穆之日哉。子貢之論貧富。猶云無諂無驕。其難能可知。鄭徐二氏能見及此。是巾幗而具丈夫之行也。況其和氣所感。及於貓犬。尤爲希有之事。焉得不令人景仰而師法之哉。

【音釋】諂。媚也。○納。入也。○歸。寧。父母。見詩經。言女子歸省父母之安寧也。●緝穆。卽和睦之意。○論語。子貢曰。貧而無諂。富而無驕。何如。子曰。可也。未若貧而樂。富而好禮者也。○景仰。傾慕之意。

後進當勞 蘇少娣。姓崔氏。蘇兄弟五人。娶婦者四矣。各聽女奴言。日有爭言。甚者鬩牆操刃。少娣始嫁。姻族皆以爲憂。少娣曰。木石鳥獸。吾無如彼何矣。世豈有不可與之人哉。入門事四嫂。執禮甚恭。嫂有缺乏。少娣遺之。姑役其嫂。嫂相視不應命。少娣曰。我後進當勞。我爲之。母家有餽。召諸子姪分與之。嫂不食。未嘗先食。嫂各以怨言告少娣者。少娣笑而不答。少娣女奴以妯娌之言來告者。少娣笞之。尋以告嫂。引罪。嘗以錦衣抱嫂兒。

適便溺。嫂急接之。少娣曰：無遽，恐驚兒也。了無惜意。歲餘，四嫂自相謂曰：五嬪大賢，我等非人矣。柰何若大年為彼所笑，乃相與和睦，終身無怨語。呂坤曰：專利辭勞，好讒喜聽，婦人之常性也。然始於彼之無良，成於我之相學。三爭三讓，而天下無貪人矣。三怒三笑，而天下無凶人矣。賢者化人從我，不賢者壞我，猶人我於蘇少娣心服焉。

【音釋】閱，音倪，爭鬪也。詩經：兄弟閱於牆外，禦其侮，操平聲，持也。○役，使也。○娣，奴，妯娌，皆兄弟之妻，相呼也。笞，鞭責也。○尋，旋也。○遽，急也。●讒，士咸切，音饒，以惡言毀善，害能也。○三爭三讓，言彼屢爭我屢讓之。○三怒三笑，言彼屢怒我俱笑以置之也。

矜卹弟妹 何氏永嘉王木叔妻也。初歸王氏家甚貧。何氏佐以勤儉。家田遂饒。一日語夫曰：子可出仕。柰弟妹貧寒何。囊中餘資，久蓄奚益。請以分之。夫喜曰：是吾志也。且日盡散簪珥不遺。木叔既仕，又曰：弟妹尚困，有田如許，何不畀之。夫喜曰：此尤吾志。遂以田與弟妹。一郡稱為賢婦。

丈夫偏聽妻室之言，視弟妹為贅疣，遠之去之，而後快者，滔滔皆是。況

散資畀田。從而矜卹之。以遂木叔之志乎。況家業豐饒。由於勤儉佐成之乎。況簪珥不遺。無一毫私利之心乎。嗚呼。賢如何氏。誠足以爲世勸。

【音釋】

卹。何也。○簪珥。婦人飾物。遺。留也。○困。窮也。畀。與也。●贅。屬也。

疣。音由。莊子。附贅懸疣。人身之橫生。結肉。喻其餘剩而無用也。○矜。憐也。

厚遇小姑。歐陽氏。宋人。適廖忠臣。踰年。舅姑死於疫。遺一女。閨娘。纔數月。歐陽適生女。同哺乳之。乳不能給。乃以其女分鄰婦乳。而自乳閨娘。二女長成。歐陽於閨娘。每倍厚焉。女以爲言。歐陽曰。汝吾女。小姑祖母之女也。且汝有母。小姑無母。何可相同。因泣下。女愧悟。凡諸讓姑。而自取餘。忠臣後判清河。二女及笄。富貴家多求姪氏。歐陽曰。小姑未字。吾女何敢先。且聘吾女者。非以我愛吾女乎。其問諸鄰人。卒以富貴家先閨娘。簪珥衣服器用。罄其始嫁妝奩之美者。送之。送女之具不及也。終其身如是。閨娘每謂人曰。吾嫂吾母也。歐陽歿。閨娘哭之至嘔血。病歲餘。聞其哭者。莫不

下淚。

呂坤曰。姑嫂。世所謂參商人也。嫁女之家。聞有小叔姑。則戚。而嫂亦厭惡此兩人。若不可一日有。何者。爲母耳目。譖愬相虐也。世之爲嫂者。誠如歐陽氏賢。則舉世皆閨娘矣。吾以是知一人盡道。兩人成名。同室仇讎。過分多寡耳。難以罪一人也。

【音釋】判。典治州郡也。笄。音雞。簪也。古者女年十五曰及笄。猶男之及冠。○罄。音磬。盡也。奩。音連。嫁女之具。曰妝奩。●參商二星名。此出彼入。兩不相見。喻人之不睦也。○戚。愛也。○譖。音僭。愬。同訴。譖。愬。譏毀之言也。虐。苛責也。

不擅私財。陳安節之妻王氏。始嫁歲餘而夫卒。遺孤甫月。家貧。王氏躬操勤苦。如男子。修行最謹。教子孫有法。家漸以饒。鄉人敬之。呼曰堂前。初堂前之歸。陳氏也。夫之妹尚幼。堂前教育。撫字如女。及笄。厚嫁之。舅姑歿。妹求分財。堂前盡出室中所有與之。無吝色。妹得財。盡爲夫淫蕩所罄。貧不能自存。堂前又爲置田宅。撫諸甥。如己出。終無怨語。親屬有貧不能自

存者。收養婚嫁。至三四十人。自後宗族無慮匱乏。乾道九年。詔旌表其門閭。以上敦睦親戚

呂叔簡謂堂前孝養舅姑。教育子孫。周恤宗族。無一不善。而姑嫂之情。尤世所希。蓋專欲私利。人情所不能泯。而女子尤甚。此財產爭端。所以不絕於世也。況在昔宗法社會。女子繼承遺產。絕不可能。堂前竟誼篤親親。不同流俗。不擅私財。既罄所有。以與其妹。復爲置田宅。撫諸甥。此求諸兄弟手足之間。猶不可多得。而況出於嫂氏乎。今者女子繼承權。載列民法。而女子繼承之訟。乃數見無已。何自私之甚。而不能原情守法耶。於此益歎堂前之姑嫂深情。爲不可及。願今人觀感警悟。勿徒重利忘義。肇閱牆之禍焉。

【音釋】甫。纒也。○撫。撫養。字。許字。○淫。荒淫。蕩放。蕩。○匱。盡也。乏。少也。●希。少也。亦作稀。○私利。自私自利也。泯滅也。○宗法。指子孫承襲祖父餘蔭。卽家族主義。重男輕女之舊習也。篤厚也。擅專也。○已。止也。○肇。啓也。

趙姬立盾。趙姬，晉文公女也。初，文公爲公子時，與趙衰音崔奔狄。狄人隗

委音氏入二女。公納季隗，以叔隗妻衰。生盾。及反國，文公又以女趙姬妻

之。生原同。屏括樓嬰。趙姬請迎盾與其母。趙衰不敢從。姬曰：不可。夫得寵

忘舊，安富室而棄賤交，何以使人。雖妾亦無以待巾櫛矣。詩不云乎：采葑

采菲，無以下體。故舊之情，不念小過。況同好乎。又曰：燕爾新婚，不我屑以。

傷夫道之薄也。君其逆迎也之。衰乃逆叔隗與盾來。姬以盾賢，請立爲嫡子。

使三子下之，以叔隗爲內婦而已下之。

呂坤曰：婦人能容妾足矣。況身自爲妾乎。況以公女而妾狄乎。況以子

爲庶子而嫡狄女之子乎。趙姬之賢，古今一人而已。

嫡庶名分，世人斤斤以爭，不予僭越。一若居妾位，列庶子，卽有損人格。

不齒於眾者焉。蓋觀夫趙姬之逆叔隗，嫡趙盾，孰不謂爲知禮。敬其立

賢容人下人之名，流傳不朽，徒爭名位者，可以省矣。

【音釋】

葑菲俱菜名。生於低溼之地。采葑采菲。見詩經。邶風。蓋喻不以卑下。棄而不采也。○燕與宴同。安也。屑。輕視之也。詩經註云。屑。潔也。不以爲潔而與之也。蓋言安樂於新婚。不屑與舊人相處也。傷。憂傷也。●省悟也。

謙謙自下

衛靈王薨。夫人無子。傅妾有子。事夫人八年。供養愈謹。夫人

謂傅妾曰。吾聞主君之母不妾事人。今我無子於禮當斥。得留盡天年。幸矣。孺子不改故節。我甚媿之。願出居。以時相見。傅妾泣曰。妾聞忠臣事君。孝子養親。惟患無日。妾豈敢以小貴變節哉。惟夫人無相棄。夫人曰。無子之人。而辱主君之母。雖子欲之。如禮何。固求居外。傅妾謂其子曰。吾聞謹上下之儀。修先古之道。謂之順。今夫人居外。我居內。是彰吾之不容。而逆閨門之禮也。處逆而生。寧以順死。欲自殺。其子泣而守之。夫人懼乃止。傅妾以妾事夫人。終身不衰。

我國婦人。以有子與否。易其地位重輕。此最不平等待遇。迄今尙不能盡革。且家庭每起糾紛。有子者逞其驕矜。無子者遂懷嫉妒。相爭相擾。

不克安居。陋習使然也。如衛靈夫人。謙謙自下。傅妾之恭順不衰。誠爲美具難併。百不得一。書此以爲世勸。

【音釋】

諸侯死曰薨。○主君一國之主也。○斥屏絕也。○惟獨也。患慮也。○固求堅請也。○彰顯也。不容不能容人也。逆違反也。○衰改也。○易更改也。革除也。○糾紛散亂也。逞恣也。克能也。○美具難併。言二人之行皆所難能。美德相等也。

不專夫室。女宗者。宋鮑蘇之妻也。鮑蘇仕衛三年而娶外妻。女宗養姑甚謹。因往來人問候其夫。賂遺外妻甚厚。其嫂曰。人既有所好。子何留乎。女宗曰。婦人一醮不改。供衣服以事夫子。精酒食以事舅姑。以專一爲貞。以善從爲順。豈以專夫之室爲善哉。忌夫所愛。是謂貪姪。婦德之恥也。嫂不教我以居室之善。而欲使我爲可棄之行耶。不聽。宋公聞之。表其閭曰女宗。

多妻之制。固爲脫輻之由。然自歐風東漸。婚姻競尙自由。於是人有所好。子何留乎。若蘇嫂之言者。竟不知凡幾。甚至無恥婦女。亦若男子之

營外室。昔僅夫棄其妻。今更婦屏其夫矣。而離異改嫁。行若無事焉。嗚呼。廉恥之道喪。婦德之不修。至於此極。可不亟起而挽救乎。爰將女宗從一不改之志。表而出之。俾知古賢婦之操持有如此者。非好作老生常談也。

【音釋】

賂。餽贈也。○醮。嫁時別酒。故婦人再嫁。曰再醮。貞。正而固也。○姪。亦作淫。●輻。車輪中木。脫輻。喻夫妻之離異也。

不擅寵愛。楚莊王好獵。夫人樊姬諫不聽。乃不食禽獸之肉。王改過。勤於政事。嘗聽朝罷晏。姬迎曰。倦乎。王曰。與賢者語不知倦。姬曰。王之所賢者誰也。曰。虞丘子。姬掩口而笑曰。虞丘子賢則賢矣。未忠。妾執巾櫛十一年矣。遣人之鄭衛求美人。進於王。今賢於妾者二人。同列者七人。妾豈不欲擅王之寵愛乎。妾聞堂上兼女。所以觀能也。妾不敢以私蔽公。欲王多見知人。今虞丘子相楚十餘年。所薦非子弟。則宗族。未聞進賢退不肖。是蔽君而塞賢路也。妾故笑之。王悅。明日以告虞丘子。丘子避席不知所對。

於是使人迎孫叔敖而進之。王以爲令尹。治楚三年。而莊王以霸。以上能容

入宮見妒。婦人之常態也。樊姬不唯不妒。更求美人以進。夫姬之美者。美其德也。非若後世飛燕玉環之屬也。如是率下。宜有文王后妃之風焉。其有裨於楚莊者大矣。至爲相進賢之論。允爲秉國用人者金鑑。豈僅令虞丘避席而已哉。諫獵之不食肉。尤能體天地好生之德。而懷仁人惻隱之心。觀此知楚莊之霸。有由來矣。

【音釋】

擅專也。○罷。止息也。晏。晚也。○寒。雍閉也。○避席。以示忝居其位也。●飛燕。玉環。爲漢唐兩代妃嬪。女媚事其君者也。

窺御激夫。晏子相齊。將出一僕爲之御。擁大蓋策駟馬。甚自得也。僕歸。其妻怒曰。宜矣。子之卑且賤也。晏子長不滿六尺。身相齊國。名顯諸侯。我從門間觀其志氣。恂恂自下。思念深矣。今子身長八尺。爲人僕御。乃洋洋自滿。妾甚羞之。其夫謝請改。乃深自謙遜。嘗若不足。晏子怪而問之。具以實對。於是言於景公。以爲大夫。顯其妻以爲命婦。

奴顏婢膝。諂事權貴者。未有不志驕意滿。傲物凌人者也。爲其妻者。方將引以爲榮。從而誇耀之。孰能鄙之賤之。深以爲羞者哉。此趨炎附勢。倚強肆虐之徒。所以不絕於世。而德業之修進。愈不可得。卓哉晏御之妻。獨有千古矣。

【音釋】

晏子名嬰。字平仲。齊之賢相。與管仲並稱。○御者。卽車夫。大蓋。

駟馬。○和遜也。●誇。矜。誇。耀。眩。耀。孰。誰。也。○倚。賴。也。肆。恣。也。

毋泣牛衣。王章字仲卿。漢時泰安人。初爲諸生。遊學長安。獨與妻居。家貧無被。病臥牛衣中。與妻涕泣。妻厲聲曰。仲卿京師尊貴在朝廷。人誰踰仲卿者。今疾病困厄。不自激昂。乃作兒女情態。何鄙也。後章爲京兆尹。宴安使人暇逸。困厄使人頹喪。短英雄之氣。寒壯士之心。其爲害也相若。觀夫近日青年。困於生活。而自殺者踵相接。特取牛衣激勵之語。爲當世之爲婦者進一言。俾以勸勉其夫耳。

【音釋】

長安。今陝西長安。漢時都城。○牛衣。編亂麻爲之。○厲聲。大聲也。踰。越也。○激昂。奮舉也。態。態度。●相若。相似也。○俾。使也。

厲夫脫囚。劉應秋之父。爲潯州司理時。撫軍發一囚來。密授意旨。教擬重辟。公晝夜歎息。夫人問故。公曰。此冤獄也。上官命擬死。拂之則不利於官。順之則枉殺無辜。情理兩難。是以歎息。夫人厲聲曰。去官事小。人命事重。安有殺人以保爵位者乎。公遂力白其冤。脫囚之罪。上司呵責。公卽解綬去。其後子孫皆以科第顯。莫不謂爲仁德之報。

此冤獄也。上官命擬死。是於生中求死。仁人所不忍聞。不忍言也。而況親執其獄乎。劉公歎息躊躇。天理人欲交戰之機也。惟夫人明之以義。乃克持之以正。解綬不顧。卒致子孫享科第之榮。設內助不賢。則蔽於利欲。枉殺無辜。安能以善其後耶。蓋脫一囚之死罪。不但子孫銜感。卽其祖若父。以暨其子孫。莫不世世酬恩。生生感德。若此而猶不獲善報。未之有也。彼殺人媚人者。果能永久保其爵位耶。朝爲座上客。暮爲階

下囚固不勝縲數矣。孰得孰失。願世人詳審於此。

【音釋】

司理治獄之官。撫軍軍政兩兼之職。辟。誅戮也。○拂。違逆也。辜。音姑。無辜枉死也。○呵。斥也。綬。印綬。解綬。棄官也。●躊躇。音籌。

廚。疑而難決之貌。○克。能也。○暨。音既。及也。○媚。諂媚。○勝。平聲。縲。絲縲。言其難悉數也。

不死於邪。越姬者。越王勾踐之女。楚昭王之姬也。昭王燕遊。蔡姬在左。

越姬參右。既驩。同歡王問二姬曰。樂乎。蔡姬對曰。樂。王曰。吾願與子生若此。

死。又若此。蔡姬許之。復問越姬。越姬對曰。昔我先君莊王。淫樂三年。不聽

政事。終而能改。卒霸天下。妾以君王爲能法我先君。將改斯樂。而勤於政

也。今則不然。而要婢子以死。其可得乎。妾聞之諸姑。婦人以死章君。若苟

從於邪。以益君之過。而笑諸侯。妾不敢聞命。於是王悟。敬越姬之言。以上

激勸

生命至重也。孔子以像人殉葬。罪及作俑。其旨深矣。楚昭於燕樂之時。

要人以死。足見昔日君主之肆虐。祇知惟我獨尊。視人命如草芥。專制

之毒可勝言哉。越姬從邪之言，可爲千古殉情者鑑。更因此而激勵昭王，其賢愈不可及矣。

【音釋】

參列也。○要平聲。挾持也。○章彰通。○邪不正也。●俯殉葬木偶人也。見孟子。

義命自安。余氏歛諸生黃僮妻也。僮少好遊冶，不務家政。氏稍諭之，反生惡感。復置一妾，恃寵凌上。氏恬然自若，不與之較。無何，僮病，氏侍湯藥，衣不解帶者累月。僮病劇，氏籲天刲股以進。後竟不起。氏哀毀盡禮，族嫜以婦盛年無子，且夫婦素無歡感，勸令改志。氏曰：「貴賤命也，奚以擇而苟得乎？」自是茹齋事佛，日課彌陀。晚則跏趺修觀，嘗刺血書彌陀、觀音、普賢、地藏等經，用資親壽。遇親故，則精誠懇切，教以孝悌。每謂人曰：「人身難得，得而不爲，殊可惜也。氏爲親爲舅爲夫，三度刲股，可謂孝而義矣。」此賢達俗謂聰明女子多薄命，奚以概而論乎？夫青年無子，嫠居者，因宿世殺害之業，感不稱意報，是失修也。復有女子前劫已修，父顯夫榮，聰利過

人乃不事婦道。聲名狼藉。自暴自棄。死於不軌者。纔所謂薄命之鬼也。余氏自知命蹇。富貴未足動其心。凌辱無以移其志。甘心茹苦。日課彌陀。刺血書經。用期親算。所謂改往修來。世出世善兼而有之。安得謂之薄命乎。

【音釋】遊冶以聲色娛樂也。○恬音甜安也。○籲音裕呼也。○嫜音章。夫之父母也。○跣音加夫盤腿而坐也。修觀謂修習觀照。注出於軌度之外也。●不軌。

第二章 賢后

馬后練服。漢明帝后馬氏。伏波將軍援之女也。正位中宮。謙抑節儉。不私所親。肅宗欲封諸舅。太后不聽。明年夏大旱。言事者以爲不封外戚之故。太后乃下詔曰。凡言事者。皆欲媚朕以希恩耳。昔王氏同日五侯。其時黃霧四塞。不聞澍雨之應。田竇田竇田嬰貴寵橫恣。傾覆之禍。爲世所傳。故先帝慎防舅氏。不令在樞機之位。我爲天下母。而身服大練粗熟布。食不求甘。

左右但著布帛無香薰之飾者欲以身率下也。以爲外戚見之當傷心自
勅。前過外家馬氏見問起居者車如流水馬如游龍故不加譴怒但絕歲用
而已冀以默媿其心而猶懈怠無憂恐心吾豈可上負先帝之命下虧先
人之德重襲西京敗亡之禍哉。

呂坤曰士庶人女莫不私其所親況太后耶。馬后懲於田竇五王之橫
裁抑外家不令封侯身爲天下母而衣大練之衣無三昧之膳敦節儉
以爲天下化非其盛德何能割恩任怨約已率人若此。

【音釋】

肅宗即漢章帝。○言事即諫議之職。○媚諂事也。朕我也。秦漢
以後爲君主自稱專詞希冀也。恩寵也。○澍雨時雨也。○田蚡
竇嬰與王氏俱西漢外戚之專權者。○樞機喻居要職。○勅誠也。○譴
怒怒而責之也。○冀望也。○重復也。襲承也。漢初都長安光武中興遷
於洛陽故稱前漢爲西京。●懲鑑戒也。○約己自處儉約也。率表率也。

鄧后辭讓 漢和帝后鄧氏名綏太傅禹之女孫克己爲懷德冠後庭當
立后時辭讓再三。是時方國貢獻競求珍麗之物自后即位悉令禁絕歲

時但供紙墨而已。及爲太后。水旱十載。每聞民飢。達旦不寐。躬自減撤。以救災戾。天下復平。歲仍豐穰。以上克己

蔡六龍云。人君淫縱豪奢。多欲喜事。則賦斂日急。四海困窮。暴民強敵。乘機而起。劫掠貨財。屠戮男女。江河流赤子之血。原野積征夫之骨。兵連禍結。社稷遂亡。亦何利哉。能崇節儉。天下不難平矣。

【音釋】鄧禹。光武中興時名臣。○克己。謂能制勝私欲也。後庭猶云後宮。○方國。四方諸侯之國。悉盡也。○達旦。至曉也。寐。臥息也。撤。除也。戾。同厄。困也。穰。盛也。●多欲。利欲之心勝也。赤子。始生之兒。以喻小民。征夫。出征之人。社稷。國君所祭之神。以喻國家。

長孫規諫。唐太宗長孫皇后。性仁孝。以謙儉爲先。好讀書。常與上商權。獻替裨益。益宏多。病篤。與上訣曰。勿以外戚處權要。勿以邱壘勞費天下。願陛下親君子。遠小人。納忠諫。屏讒慝。省作役。止遊畋。則妾死不恨矣。后崩。太宗哭之慟。曰。此後入宮。不聞規諫。失良佐矣。

太宗一代英主。固能親賢遠佞。納諫屏讒者也。長孫后病篤之時。猶諄

諄以諫。可知爲君難。知人不易矣。愚闇柔懦之主。安有不亡國喪身者哉。至作役遊畋。勞費天下。亦皆病民亂國之由。荒淫無度。好大喜功者。所當引爲深戒。其賢若此。其識若此。於其崩也。太宗慟失良佐。不亦宜乎。

【音釋】獻替進其可而廢其不可也。○篤重也。處上聲。居也。邱壘陵墓也。○屏除也。慮音忒。惡也。省減也。役勞役畋田獵。○崩死也。●諄諄忠謹懇切之貌。○闇不明也。懦弱也。

保全功臣。明太祖馬皇后。習知兵事。在軍中。緝衣履以給將士。常謂帝曰。方今豪傑並爭。雖未知所歸。以妾觀之。惟以不殺人爲本。人心所歸。卽天命所在。若掠殺以失人心。雖其身亦難保也。帝嘗比之唐長孫后。后曰。妾聞夫婦相保易。君臣相保難。妾安敢比長孫后。但願陛下以堯舜爲法耳。性恭儉。既貴。服澣濯衣。每製餘帛爲巾。以賜諸王公主。曰。生長富貴。當令知蠶桑之不易。爲天地惜物也。帝以威武治天下。后輔之以仁慈。勸常

保全功臣。帝亦多所寬宥者也。以上輔君

孟子曰。不嗜殺人者能一之。此固不易之理。然擁兵毒民。驕橫自恣者。孰知民視之可畏哉。湯武弔伐之師。所以罕見於後世也。而烏盡弓藏。兔死狗烹。尤爲千古同慨。馬后諫以掠殺而天下定。勛以相保而羣臣安。其仁慈惻隱之懷。實不可多得。比諸唐長孫后。又何愧焉。

【音釋】緝。縫綴也。○掠。奪也。○澣。濯洗也。○宥。恕也。●嗜。好也。○天視。自我民視。見書經。○罕。少也。○烏盡弓藏。兔死狗烹。言獵者因狗。以喻天下既定。殺戮有功之臣。

第四章 母儀

嗣母慈仁。魏慈母者。孟陽之女。芒卯後妻也。生三子。前妻有子五人。皆不愛母。母遇之甚厚。乃令己所生三子。不得與前子齊衣食。前妻五子。猶不愛。未幾前妻中子犯魏王令。當死。慈母憂戚營救。或曰。子不愛母。至甚。何爲勤勞憂懼如此。慈母曰。妾之親子。雖不愛妾。妾必救其禍。又除其罪。

今於前子則不然。何以異於無母哉。且其父爲其孤也。使妾爲其繼母。繼母爲人母而不愛其子。可謂慈乎。魏王聞而高其義。乃赦之。後五子親附。慈母雍雍若一。八子咸爲大夫卿士云。●東漢時程文矩妻穆姜。生二男。而前妻四子。文矩卒。四子以母非所生。憎毀日積。而穆撫字益隆。衣食資供。兼倍所生。前妻長子興疾篤。穆親調藥膳。久乃瘳。於是呼三弟謂曰。繼母慈仁。出自天授。我兄弟禽獸其心。過惡深矣。遂將三弟詣南鄭獄。陳母之德。狀已之過。乞就刑辟。郡守表母。蠲除家徭。遣散四子。許以改革。後並爲良士。母年八十餘卒。

人子之與父母。當盡心竭力。以致其孝養。於生母然。於嫡母。嗣母。庶母。當無不皆然。而嗣母。繼母。庶母。之於前妻之子。亦宜一於慈仁。不可有所軒輊。世人以嗣母。繼母。庶母。非其所生。往往不能孝養。甚或憎之。毀之。而爲嗣母。繼母。庶母者亦然。家庭於是多故。甚或釀成蕭牆之禍。魏

慈母與程文矩妻。遇前妻之子。雖憎毀日積。而撫字益隆。一則子犯令。則憂戚營救。冀除其罪。一則子疾病。則親調藥膳。瘳而後已。卒之前妻之子。罪既得宥。悔過親附。並爲良士。足見家庭骨肉之間。苟誠心相待。無有不可以感孚者。若一母者。足爲世之爲嗣母者法。

【音釋】

嗣母。繼母也。慈。上愛下曰慈。魏國名。戰國初。魏斯與韓趙共分晉地。國號魏。齊無參差錯雜之謂。憂戚。愁哀之貌。除。

去也。孤。凡無父者皆稱孤。妾。女子自稱之謙詞。赦。免除也。雍雍和睦也。東漢朝代名。漢光武中興。都洛陽。號曰東漢。憎。惡也。愛之反。撫字。撫育愛憐之也。膳。食也。瘳。音秋。病愈也。南鄭地名。今屬陝西省。獄。牢獄也。陳述也。狀文之敘述事實而以上陳之謂刑辟。國家之刑法。郡守。知府也。蠲。除去之也。徭。音遙。役也。古力役之征曰徭。良士。善士也。嫡母。妾所生之子稱父之正妻曰嫡母。庶母。舊律以父妾之有子女者爲庶母。今世俗父妾均稱庶母。軒。輕重也。車前高曰軒。後低曰輕。蕭牆。言至近之地。

教子義方。程大中平居與幼賤處。惟恐拂其意。左右使令之人。無日不

察其饑寒。夫人侯氏治家有法。不嚴而整。不喜鞭扑奴婢。視小臧獲如兒女。諸子或加譴責。必戒曰。責賤雖殊。人則一也。汝能爲此事否。獨諸子有

過雖小必責。大則請命於大中。督其改而後止。嘗語人曰。子之所以不肖者。皆母隱其過。父終不得而知。故無以正也。

母之於子。當其童幼之時。往往以姑息爲愛。有過而不加斥責。至長大而不肯率教。皆幼時姑息之所致也。諺云。教子嬰孩。誠千古至言。侯夫人於諸子有過。雖小必責。請於其夫。督其悔改而後已。可謂善教子者矣。其謂子之所以不肖者。皆母隱其過。一語破的。千古名言。

【音釋】義方。言志之所向。能合乎義也。○鞭。笞也。扑。打也。臧。獲。奴婢也。○譴。音遣。責問也。○隱。匿也。諱之也。●姑息。謂子有過。寵愛而不加斥。

第五章 仁德

富貴不驕。唐東光公主楚媛。幼以孝謹稱。適司議郎裴仲將。相敬如賓。姑有疾。親嘗藥膳。遇娣姒皆得歡心。時宗室諸女。皆以驕奢相尙。謂楚媛曰。所貴於富貴者。得適志也。今獨守勤苦。將以何求。楚媛曰。幼而好禮。今

而行之。非適志歟。覺自古女子。皆以恭儉爲美。縱奢爲惡。辱親是懼。何所求乎富貴。儻來之物。何足驕人。眾皆慚服。

爲婦女者。大都好奢侈而羞儉約。處富貴者爲尤甚。不知由儉入奢。易由奢反儉難。而帝王巨室。尤爲一國所慕。城中好高髻。四方高一尺。風行草偃。理所必然。故奢侈之風。不特關係於個人家庭。且影響及於國家社會。非細故也。宗室諸女。皆以驕奢相尙。而楚媛獨守勤苦。可謂知國奢示之以儉之義矣。其謂恭儉爲美。縱奢爲惡。辱親是懼。尤爲千古至言。有國有家者。皆當茲韋佩之。

【音釋】

東光。今縣名。屬河北省。公主。天子之女也。○適。女子出嫁。曰適。司議郎。官名。○嘗。試也。膳。食也。娣。姒。兄弟之妻。○宗室。皇族也。

○慚。服言羞。媿而嘆服也。●奢侈。謂用財無節也。○高髻。挽髮而束之於頂也。風行草偃。言君子之德風。小人之德草。草上之風。必偃。見論語。○國奢。全國奢侈也。○弦韋。西門豹性急急。故佩韋以自緩。董安于性緩。故佩弦以自急。

儉德免禍。北魏史姚婦楊氏。閨人符承祖姨也。家極貧。及承祖爲文明

太后所寵貴。親戚皆求利潤。惟楊獨不欲。謂姊曰。姊雖有一時之榮。不若妹有無憂之樂。姊遺其衣服。不受。強與之。則曰。家貧美服。使人不安。遣車迎之。不起。強舁車上。則大哭。言爾欲殺我。及承祖敗。執其二姊至殿庭。一致法。姚氏衣裳敝陋。免罪。

人之憂樂。在一心而不在貧富貴賤。志為聖賢。雖簞食瓢飲。見其樂而不見其憂。熱中富貴。雖窮極奢欲。亦僅見其憂而不見其可樂。楊氏謂其姊雖有一時之榮。不若已有無憂之樂。其識見迥不猶人。後承祖敗。其姊伏法。而楊得免。則又有先見之智矣。

【音釋】

北魏朝代名。北朝之一。姓拓跋氏。晉時拓跋珪自立為帝。國號魏。都平城。史記事之書曰。史闡人。司晨昏。啓閉門戶之人。○文

明太后姓馮氏。利潤。分潤之意。○舁音余。今謂扛抬曰舁。○致法。擢於法也。○敝。壞也。陋。醜劣也。●簞。盛飯竹器也。其形圓。瓢。挹水及盛酒漿之器。簞食瓢飲。言其貧也。一。篋。食。一。瓢。飲。見論語。○迥。不猶人。迥。遠也。事。遠勝於人也。○伏法。有罪就戮也。先見識見較先於常人者。智深明也。

以儉化人。按察使周新夫人有節操。新未遇時。縫紉自給。新貴。同官妻內讌。邀新妻至。則荆布如田家婦。諸婦慚。盡易其衣飾。以上節儉

人之貴賤榮辱。視乎品學。而不由於章身之衣服也。無識之人。以華服自文其陋。於是羣然效之。西人工於牟利。華綺美麗之織物。及化粧之品。日新月異。層出不窮。國人喜新厭故。奇裝異服。自炫摩登。俗日侈。財日匱。影響且及於國家。於是嘆非先王之法服。不敢服。誠慮遠之言也。周新夫人與同官妻讌。荆布之服。不改其素。致諸婦慚而易衣。可見儉爲美德。人有同心。苟在上者誠心提倡。移易風俗。實非難事。惜如周新夫人者如鳳毛麟角耳。

【音釋】節操。貞節操守也。○未遇。未仕時也。縫紉。做衣服也。○讌。與宴同。與客飲酒也。邀。請也。○荆布。荆釵布裙也。●文。裝飾也。○牟。利取利也。○炫。凡矜誇欲自表見者曰炫。○匱。乏也。○鳳毛麟角。言希世之珍難得也。

仁孝天成 張行婆 濰州昌樂人。父爲虎翼軍校。生七歲。繼母潛使僧鬻

之。給其父云亡之矣。父哭之失明。而行婆鬻泗州。故在也。後二十年。與父遇於主家。識之。抱而哭。遂辭主與父歸。主故愛其勤恪。聽焉。父欲逐繼母。行婆曰。兒非母不得入貴人家。兒歸而逐其母。於心安乎。父乃止。後父卒。事繼母益勤。母老不能行。負之行。已嫁爲里人王祐妻。祐卒。遺一男二女。幼。行婆誓不再適。鞠之。婚嫁畢。謂子曰。吾素樂浮屠法。欲出家。今其時也。吾不復爲爾母矣。遂去。爲比丘尼。閒自澁之泗。省其故主家。主館之一室。日一食。誦經拜佛。與女僕語。專誨以忠勤。有不受。話之。輒拜謝不較也。遇煩辱事。輒以身先之。女僕幼者。爲櫛沐。紉縫。視之如己女。至貓犬。輒以時飼之。行婆去。貓犬爲悲鳴。不食者累日。此孝慧

古來遭繼母之虐。而孝敬不衰。卒致親心底豫者。首推閔子。張行婆爲母所鬻。飾詞誑文。視閔子之母爲尤甚焉。乃毫無怨尤。其諫父之言。剴切婉轉。與閔子如出一轍。可謂孝矣。至夫亡以後。鞠子成立。恩逮奴婢。

兼及貓犬仁孝天成方之賢哲何以尙茲。

【音釋】

濰州。今濰縣。昌樂縣名。今屬山東。○給音殆。誑也。○鞠養也。○浮屠

法。謂佛教也。○比丘尼。女僧也。○館舍之也。○詬音苟。辱也。○閱子。孔子弟子名。損字子騫。性孝。少爲後母所苦。○飾詞謂託言文過也。

第六章 高節

尙德緩刑。陳氏惠謙。張亮則之妻也。亮則官於扶風。吏白欲重禁嚴防。以肅非常。亮則詢於惠謙。惠謙曰。恢宏德教。養廉免恥。五刑三千。蓋亦多矣。又何加也。

國家設吏。蓋爲民也。爲治之道。以便民爲先。民所不便。何以吏爲。故爲政者。莫要於安民。而不急於利。世之居民上者。以褊急爲心。苛察爲治。變亂舊章。徒取目前之便。藉口興利除弊。以自炫其才。不知利弊互相倚伏。有利必有弊。興一利必生一弊。除一弊或又滋一弊。於是上日勞。下日困。而民無所措手足。所謂天下本無事。庸人自擾之。張亮則欲重

禁嚴防。陳氏告以恢宏德教。尙德緩刑。誠知本之論。不圖巾幗中有此吏才。

【音釋】扶風縣名。今屬陝西。○恢宏廣大也。○刑謂刑法。有三千條。分輕重五等也。舊律以死流徒杖笞爲五刑。●苛苛刻也。變亂變更而紊亂也。炫誇也。○滋生長也。○巾幗婦人也。○吏官吏也。

不有私財。沂水劉應賓爲吏部郎中。其妻耿淑人。傾箱倒屣。上其裝於尊老。洗手無一錢。當權璫擅政。勸應賓請退。不挂於禍。逆闖犯闕。贊應賓遠避。不罹於兵。皆淑人力也。

曲禮論孝曰。不有私財。世人於父母不能盡孝。皆由於私妻子而好貨財。不知苟無父母。何有此身。此身且爲父母所遺。何況於身外之財帛。自乳哺教養使我成人。竭畢生之心血於我之身者。乃父母也。非妻子也。人或不幸喪妻。猶可再續。苟不幸而喪父母。則上天下地。更何處再得此撫我愛我之人。人子以勞心力之所得。盡其所有以奉事父母。亦

何能報劬勞之恩。爲人子者。能將父母妻子資財。一一權衡其輕重。則孝親之念。不難油然而生矣。劉耿氏盡其資財以奉尊老。洗手無一錢。洵可謂不有私財。善爲人子婦者矣。至於其夫不懼權璫之禍。不遭闖獻之兵。雖見其機智過人。然安知非孝念所感。冥冥之中有陰相者耶。

【音釋】

沂水縣名。今屬山東。吏部郎中官名。○淑人。三品之誥封也。傾

權璫擅政。謂宦官專政。按此時係明熹宗時。宦官魏忠賢擅政。專橫無忌。○逆闖犯闕。謂李自成從從馬賊高迎祥。高稱闖王。李號闖將。後高伏誅。自成爲闖王。故稱逆闖。犯闕。謂犯京城也。權受也。●曲禮。禮記篇名。

擇賢而事。謙靖先生劉愚妻徐氏。龍游人。未笄有志操。姑子富。母欲以

字之。徐泣曰。願得志行者事之。獨爲富人妻。不願也。時愚通經學。隱居敎授。請聘之。乃許。既歸。愚結廬城南以居。頽垣敗壁。蓬蒿蕭然。著書以自適。徐機杼佐之。裕如也。一日。愚懷白金數銖以歸。徐怒曰。妾以君爲賢。願歸族。今安所得金乎。愚出書。則諸生所具束脩也。乃受之。後愚爲安鄉令。卒。

士友私諡曰謙靖先生妻之助也。以上尙德

古語云。婚娶而論財。夷虜之道也。世風日降。擇婿擇婦者。不重資產。則重門閥。不知夫婦之道。一與之齊。終身不改。苟非其人。則畢生爲怨耦。雖銅山金穴。位極人臣。亦徒自苦耳。徐氏擇賢而事。不願爲富人妻。非白親操。勛夫廉潔。高風美德。足以媲美孟光。

【音釋】

龍游縣名。今屬浙江。○志操。志向之謂。○結廬。謂結草爲廬。○頽垣敗壁。卽俗謂牆坍壁倒也。蓬蒿。草名。蕭然繁盛貌。○機杼。

謂織布之具。裕如。謂得自然之樂也。○銖。古衡名。二十四銖爲兩。○束脩。謂饋送舉師之金也。○安鄉。縣名。今屬湖南。●門閥。門第也。○怨耦。不相和睦之夫婦也。銅山金穴。喻其富有也。位極人臣。官之極品也。○井臼親操。喻汲水舂米。均親自操作也。勛勉也。

義救生靈。高州刺史章仔鈞。欲斬二校。夫人練氏使諸子諭之曰。宜急去。且以金條脫遣以行。二校感泣。奔南唐。仔鈞死。練居建州城。建之破也。二校在行間。遣使持金帛貽練。授以白旗曰。吾且殲此城。夫人宜植旗於門。已戒勿犯矣。練卻金帛及其旗曰。公今見報。獨活我家耳。若思舊德。願

全此城。必欲屠之。吾家與眾俱死。不獨生。二校感其言。遂止。

兩國興戎。爭城以戰。殺人盈城。殘暴之軍將。更有不顧人道。全城屠殺之事。人民何辜。至可慘傷。練夫人始則以金條脫活二校之命。繼則以義感二將。活全城之命。其仁心宏德。與崇墉同千古。建州城可名之爲夫人城。

【音釋】

高州府名。在今廣東茂名縣。刺史官名。○金條脫。金鑄也。○南

史稱南唐。○建州。今福建甌縣。○行間。兵行之中。也。殲。音尖。盡殺之也。○屠殺也。●崇墉。高牆。指城牆。

棄子存姪。昔齊攻魯。至郊。見一婦人。攜一子抱一子。眾逐之。乃棄抱者。與攜者奔。遂得之。眾問攜者誰。曰。兄之子。棄者誰。曰。己子也。軍至。妾不能兩全。故棄所生而挈兄子。齊軍曰。子之於母。甚痛於心。何忍棄乎。曰。我夫尚存。可望生育。我兄已死。止此一綫。育之以延宗祀。齊軍曰。魯之婦人。猶持節義。其可伐乎。遂迴師。己子亦全。魯君聞之。賜束帛。號曰義姑。

事當不能兩全之際。不可不權衡其輕重。當軍亂避地之時。子與姪不能兩存。以恆情度之。或當舍姪而挈子。然兄已先亡。一綫之緒。宗祧所繫。自當竭力保全。義姑數語。仁至義盡。千載下猶想見其人。而節義所感。敵軍則聞風自退。束帛則賜自國君。人民之節義關係於國家者如是。古來有國者。遇閭閻節義之事。所以烏頭綽楔。旌門表閭。有以也夫。

【音釋】齊國名。魯國名。郊。邑外謂之郊。○逐。追也。○挈。音頁。提也。○宗。絲織品之總名。●權衡。所以稱物而知輕重者。○緒。絲端也。宗祧。猶言宗廟也。○閭閻。古里中門也。今人稱民間曰閭閻。○烏頭綽楔。謂旌表也。

割愛從夫 元秦閨夫繼室柴氏生一子與前妻子俱幼閨夫病亡以前妻子囑之柴氏鞠育無異辛勤紡織遣二子就學至正元順帝年號中有惡少殺人牽連柴氏長子法當死柴氏引次子詣官曰殺人者吾次子非長子也次子曰我自犯罪豈可加於兄乎官疑次子非柴所生訊之他囚得其

情。官義之。嘆曰。妻割愛以從夫言。子趨死以成母志。此天理人情之至也。竟兩釋之。遂上其事。旌其家。

愛親生之子女。而漠視其前妻之子女。普通婦女無識者之恆情也。況以人命牽連於法當死之日乎。柴氏欲救前妻之子。寧誣己子殺人。而其子亦甘代兄死。此子此母。仁至義盡。極天理人情之至。官卒廉得其情。而兩釋之名。達九重。旌表門閭。而其名亦千秋不朽。謂之女之賢聖。誰曰不宜。

【音釋】元。朝代名。繼室。後妻也。○囑。音燭。託也。○惡少。謂少年之無行者。牽連謂連及也。○詣官。謂至官也。○囚。謂有罪被禁錮者。○旌。音精。表章也。○誣。音無。加罪於無辜曰誣。寧。謂願加誣於己也。○甘心所願也。○廉。音連。察也。九重。人君所居也。

不悔瘋女 文紹祖之子與柴姓議婚。既聘。柴女忽瘋。紹祖欲更之。妻大怒曰。吾有兒。當使其順天理。自然久長。背禮傷義。速其禍也。仍娶之。次年子登第。女亦痊。以上仁義。

夫婦一倫造家之本。古人制婚姻之禮。雖覺繁重。實寓深意。白虎通。妻者齊也。一與之齊。終身不改。尤爲千古有室家者之圭臬。自歐化東漸。婚姻自由之說起。青年子女。靡然從風。利未見而弊竇叢生。禮經所謂婚姻之禮廢。則夫婦之道苦。不幸於今日見之。紹祖之妻。知悔婚爲背禮蔑義。願娶瘋女。其識見高出今人萬萬。卒之女病獲瘳。子亦登第。存心忠厚者。天必佑之。侈言自由。視離婚如兒戲者。亦可廢然返矣。

【音釋】瘋爲神經病之重者。○既聘。謂已由媒妁致幣而未婚娶也。更也。禮經易也。○痊。愈也。●白虎通書名。漢班固撰。○禮經。指周公所制也。

第七章 貞烈

全父潔己。浦城徐嗣源女。略通經史。每誦文天祥六歌。必爲之感泣。至正十五年。青田賊寇浦城。徐氏從嗣源逃。旁近山谷。賊持刀欲害嗣源。徐氏前曰。此吾父也。寧殺我。賊舍父而止。徐氏語父曰。兒義不受辱。今

必死。父可速去。賊拘徐氏。至桂林橋。拾炭題詩壁間。有惟有桂林橋下水。千年照見妾心清之句。乃厲聲罵賊。投於水。賊競出之。既而乘間復投水死。

文天祥六歌。詳載文山先生全集（商務印書館出版）卷之十四。五〇八頁。係歎其一家之人。妻。妹。女子。妾。以及自己之離散也。歌辭甚長。其第六歌云。我生我生何不辰。孤根不識桃李春。天寒日短重愁人。北風隨我鐵馬塵。初憐骨肉鍾奇禍。而今骨肉相憐我。汝在北兮嬰我懷。我死誰當收我骸。人生百年何醜好。黃梁得喪俱草草。嗚呼六歌兮勿後道。出門一笑天地老。

寇盜縱橫。倉皇逃避。不幸與之相值。目覩其父已爲所縛。欲免父則不能守身。欲守身則父不能免。恆人處此。萬難兩全。徐氏始則以計給賊。及父已遠颺。則又奮勇罵賊。以求一死。其計慮周密。智勇兼全。鬚眉中

亦不多覩。不意巾幗中竟有是人。

【音釋】

浦城縣名。今屬福建。○舍棄也。○競爭也。○乘間乘人不備也。○寇盜縱橫。南北爲縱。東西爲橫。言寇盜遍地也。倉皇急遽也。

值遇也。○給騙也。颺。逃逸也。○覩遇見也。

烈女驅邪 明季歙東有某氏女。字佛嶺脚胡氏子。無何胡子病。議迎新婦以沖喜。女入門。子疾益劇。而竟不起。其母知之。欲接以歸。女曰。我字胡氏。身入胡門。安敢變初志乎。請親勿念。女自有處置。於是披麻禮宗祠。撫膺哭泣。辭姑曰。兒罪孽深重。禍及姑壻。今壻已死。兒生何爲。不若蚤死。以解宿愆。姑曰。勿作是念。子亡汝在。吾生死有託。家遺薄產足汝終老。奚必輕生若爾乎。女曰。乾道貴義。坤道重節。暴義而生。不若盡節而死。況今世風澆薄。人心險惡。不死。姑或遺累尤甚。奈何。兒非沽名。求無玷辱胡門足矣。遂自掩室絕粒。七日乃卒。三日大殮。面若生焉。觀者摩肩踵至。莫不嘉歎。先是該村水口。蔭木叢密。多諸鬼魅。驚擾行人。村人患之。自烈女墓此

後。鬼崇寂然。村人由是賴焉。

忠孝節義。爲充塞天地之正氣。人生立身之大端。凡人不拘老幼男女。壽夭窮達。失此四字。雖宿生栽培。富貴壽考。終歸天棄人厭。遺臭萬年。保此四字。縱宿業感召。貧賤夭折。畢竟鬼伏神欽。流芳百世。觀烈女于歸失所。絕粒自盡。報居六極。實由宿業。終因節烈。浩然正氣。能使鬼魅潛蹤。口碑載道。其福利社會。人民景仰之價值。想千載以下。尙有許多鬚眉丈夫。清夜捫心。亦當拜其下風。其榮譽爲何如也。惜當時無通淨業知識。爲之開導。致使節烈自盡。於世間法。實爲完人。較之葉烈女。許鮑氏。黃余氏。之貞烈奉佛。歸心淨土。由是超凡入聖。展轉普度。歷劫怨親。一切有情。同登九蓮者。又爲天壤懸殊矣。願閨閣英賢。或不幸失所。必具堅貞。以保名節。切勿怨命。以致枉死。如翁姑在堂。當盡心孝養。其有兒女者。應認真教導。再進而師葉烈女等。清齋事佛。庶爲世出世間。

美滿之完人矣。

【音釋】

膺音應。胸也。○蚤與早通。○魅音媚。鬼之爲祟者曰魅。●葉烈女。見後第十章篤誠革天節許鮑氏。見前第一章教子成名節。

黃余氏。見前第二章義命自安節。淨土。佛菩薩所居之世界。名曰淨土。九蓮。謂九品蓮華也。念佛之人。死後往生淨土。蓮華之上。因所修功行之深淺。所坐蓮花。分爲九等。卽上中下三品。而每品又分上中下。故有九品也。

烈女血痕 明史石氏女被賊執欲污之。女抱槐樹厲聲罵賊。數人牽之。不解。撕其兩手。罵如初。又斷其兩足。愈罵不絕。痛仆地。賊褫其衣。女以口齧其指。斷其三。含血噴賊。乃瞑。賊擁薪焚之。後所焚地。血痕耿耿。遇雨則燥。暘則溼。村人駭異。掘去之。色入土三尺許。

貞婦清風 宋王貞婦。臨海人。德祐二年冬。元兵入浙東。婦與舅姑夫皆被執。旣而舅姑與夫皆死。主將見婦皙美。欲納之。婦號慟欲自殺。爲奪挽不得死。夜令俘囚婦人雜守之。婦乃陽謂主將曰。若以我爲妾。欲令終身事君者也。吾舅姑與夫俱死。而我不爲之衰。是不天也。不天之人。焉將用

之願請爲服期。卽惟命。苟不聽我。我終一死。不得爲君妾也。主將恐其誠死。許之。然防守益嚴。明年春師還。挈行至岷青楓嶺。下臨絕壑。婦伺守者少懈。嚙指出血。書字山石上。南望慟哭。自投崖下而死。後其血漬皆入石間。盡化爲石。天陰雨卽墳起如始書時。至治中。旌之曰貞婦。郡守立祠石嶺上。易其名曰清風嶺云。

血磚千古 元譚氏婦趙氏。吉州永新人。至元十四年。江南旣內附。永新復嬰城自守。大兵破城。趙氏抱嬰兒。隨其舅姑。同匿邑校之後。爲悍卒所獲。殺其舅姑。執趙欲污之。不可。臨之以刃曰。從我則生。不從則死。趙罵曰。吾舅死於汝。吾姑又死於汝。吾與其不義而生。寧從吾舅姑以死耳。遂與嬰兒同遇害。血漬於殿廡兩楹間。入磚爲婦人與嬰兒狀。久而宛然如新。或磨以沙石不滅。又煨以熾炭。其狀益顯。

誠之所至。金石爲開。閭巷之間。匹夫匹婦。以一念之忠貞。往往足以感

動天地。茲三婦者以弱不勝衣之女子。劫於狂暴之寇盜。雖臨以白刃。焚以烈火。寧粉身碎骨。必欲保守其清潔無瑕之身。血痕磚影。千古不磨。浩然之氣。與天地常存矣。

【音釋】

撕讀若斯。以手裂物也。○褫音遲。奪衣也。暝音溟。閉目也。○暘音陽。天明也。○德祐恭帝年號。○哲音錫。人色白也。○俘音孚。

凡因戰而獲敵之人物曰俘。○衰與縗同。喪服也。○期一年曰期。服期謂服一年之喪也。●至元。元世祖年號。○廡音武。堂下周屋。●瑕音霞。也。玉病也。

忍死全孤。明末池州有舒生。無兄弟。舉一子而遭寇亂。謂其妻曰。死節易存。孤難汝肯爲其難者乎。其婦嗚咽久之。慨然曰。幸君父子重逢。妾死何憾。已而賊至。劫婦去。舒生轉輾流離。及清兵定川廣。舒間關至楚。乞食營中。冀與妻遇。不得見。遇官艦。縛之令挽。夜半號泣。驚將軍夫人。黎明。夫人隔簾訊其姓氏。大詫。命加銀鐙。俟將軍至。自鞫之。四日。將軍與夫人會。夫人乃舒生故妻也。將軍自賊中獲之。甚有寵。其孤尙在。至是乃泣告將

軍以孤兒還舒生。將軍心疑其夫婦私相見矣。大怒，命擒舒生來。見其荷鐵索，匍匐不能行，頭流血殷然。乃詢隸卒曰：「彼拘繫幾時矣？」曰：「四日。」將軍大喜，釋其縛。入謂夫人曰：「子誠知禮。今汝意云何？」夫人指其子曰：「妾存此一塊肉，以還舒生，無他意耳。」將軍命舒生攜其子入小艇，贈以金帛。舒生遙拜而去。行數十里，有飛騎傳將軍令追舒生。復見將軍，曰：「子行後，汝婦闔門自縊，乃悟向來忍死爲存孤也。此真節婦。渠今一死，已踐初志。幸而解救得甦，仍歸君完聚，爲兩世姻緣可耳。」舒生拜謝，悲喜交切，匍匐而歸。池人至今以爲美談。

舒生之妻，以一女子丁亂世，夫婦離散，而歷盡顛沛，撫子無恙。及邂逅而遇故夫，則枷鎖船頭，不與之面。至父子團圓，故夫已去，則闔戶自經，欲一死以自明其志。其苦心孤詣，足以泣鬼神而動風雨。卒也後夫感動，破鏡重圓，洵可謂義勇兼全者矣。曾見某氏筆記載，謂舒生數代戒

食牛肉窮途潦倒中妻孥重逢實冥冥中神祇加被耳戒殺護生一事誠可信夫。

【音釋】

孤少而無父曰孤。○明末指明朝崇禎時池州地名明為府今安徽貴池縣寇亂指李自成張獻忠等流寇作亂。○嗚咽泣聲也。○劫奪也。強取也。如搶劫掠之類。轉輾事之無定之謂流離窮困而轉徙道路也。○川指四川廣指廣東廣西間關狀道路之難行也。楚指湖北湖南也。○索繩也。縛束也。挽用力引之也。○詔訝也。○銀鑄刑具鎖也。鞫訊囚也。○索繩也。鐵索刑具。匍匐伏行狀。殷音煙。赤黑色也。○隸卒僕人也。○艇船之狹而長者。○闔閉也。縲扼頸而死也。○渠俗人稱他曰渠。甦與蘇同。死而更生也。●丁當也。顛沛人事挫折之謂。○避人避不期而會曰邂逅。○經縊也。○窮途窮困之境也。潦倒所如不合之謂。

刻像事夫 海寧董涓妻虞氏少慧知書頗善吟咏年十六歸董甫兩月

而涓卒痛絕欲死以殉家眾防之遂不得死父母惜其年少勸女再適女

不應吟菊竹二詩以見意其菊詩云移得青苗愛護周柴桑無主為誰秋

寒芳甘抱枯枝萎羞墜西風逐水流井上竹詩云一片貞心古井泉清寒

澈骨自堪憐相看歲暮青青色歷盡冰霜戴一天乃刻木為夫像晨昏事

之年五十餘卒。人皆稱爲節婦。

孝子之於親也。莫不願長侍膝下。永承色笑。不幸而遭大故。音容邈矣。警歎無聞。其哀慕之忱。計無復之。乃刻親像而事之。事死如生。爲史傳所豔稱者。首推丁蘭。貞婦之於夫也。莫不願齊眉舉案。偕老白頭。不幸而歌寡鵠。孤燈子影。獨守空幃。計無復之。乃刻夫像而事之。晨夕不離。至五十餘年。厥維虞氏。孝子節婦。苦心孤詣。若合符節。誠足以輝映千秋。

【音釋】海寧縣名。今屬浙江省。○殉。音信。以人送死也。○再適。謂再嫁也。○警歎。喻言笑也。聲之輕者曰警。重者曰歎。○丁蘭。漢孝子。少喪考妣。刻木像事之如生。○偕老白頭。謂夫婦偕老也。○寡鵠。喻孀婦。子影。形影相依也。○符節。周禮。門闕有符節。輝映。照耀也。

誓不再適。寧國屠羲英之妻。賦性貞烈。幼時許嫁羲英。羲英未第。家甚貧。會里豪有事女家。見女有色。強納聘焉。必欲昏乃已。父謂豪曰。欲得吾女。當先令屠氏無事。豪備禮謁屠。因告之故。且恃其勢。弗能與爭也。屠以

女家慕富厚而厭貧賤。遂受其禮。弗與競。女意屠必有言。而屠竟默默。乃以死自誓。豪卜日親迎。女涕泣不肯就車。父若母強之。女令與豪訣曰。妾本屠氏婦也。未親見屠郎之必棄妾也。今日之事。道必經屠氏。願至屠門。一面屠郎。彼言聽妾改從。乃敢侍巾櫛。豪意以勢言。可必屠之無他也。許之。女上車。令御者至屠氏門。呼屠與見。屠出。揭帷視之。女已拔簪自刺其喉。亟救之。血流如注。氣絕矣。豪以女既死。遂棄其尸。悉與家人奔歸。屠感其義。葬之如妻禮。

厭貧慕富。人情之常。而里豪既已納聘。屠氏亦甘退婚。父母又復強之。乃從一之義。百折不回。甘以身殉。其貞烈之風。千載下聞之。猶足頑廉懦立。

【音釋】

寧國縣名。今屬安徽省。○未第。謂未中式也。○昏與婚通。○競爭也。○御者。駕車之人也。●頑廉懦立。見孟子。

急智全節 浙江青田山農陳好密。爲仇家所害。誣以鑛盜。有公差四人。

繫其婦詹氏。日暮行僻途。四卒各欲污之。詹度不能免。其一人髻而勇。伴語之曰。幸爲我主持。勿令其亂。當到君家。惟君所欲。髻卒喜。他卒涉邪。輒止之。至黃壇山。遇樵者。因借樵刀。削其屐。削已。呼四卒曰。吾擲屐林中。誰得就歡。俟其爭取。卽自刎死。四卒驚走。時六月旬日。蠅蟲不傷。面色如生。事聞縣令陳袞。題其墓曰節婦。因斃四卒於獄。

女子貞操。同於男子氣節。鄉閭之間。婦女知守節。則風俗美而世道良。所關非細。往昔重視貞節。守節之婦。朝廷必爲之旌表。故雖當寇盜縱橫之時。而視死如飴。綱常賴以不墜。今世昌言解放。以守節爲不足重。輕甚。或目爲迂愚。此風俗之所以日頹也。

【音釋】

青田縣名。今屬浙江省。誣音無。加罪無辜曰誣。鑛盜言窩藏盜賊也。○繫囚拘也。○髻多鬚之謂伴。僞也。○樵采薪之人也。屐。

音劇。履之泛稱。如木屐。錦屐。○自刎卽自殺也。

忍貧守節 唐謝泌妻侯氏始笄適謝家事姑甚孝謹盜起焚舍殺人遠

近逃避。姑疾篤。不能去。侯號泣姑側。盜逼之。侯曰。寧死不從。盜刃之。仆溝中。賊退。漸蘇。見一篋在側。發之。皆金珠。族婦以爲己物。侯悉歸之。婦分其一以謝。侯辭曰。非我有。不願也。後夫與姑俱亡。子幼。父母欲更嫁之。侯曰。兒以賤婦人得歸。隱居賢者之門。已幸矣。忍去而使謝氏無後乎。寧貧以養其子。雖餓死亦命也。

盜焚里舍。遠近逃避。而以身衛姑。白刃可蹈。勇也。金珠在篋。悉歸他人。酬之不受。廉也。夫姑俱亡。遺孤尙幼。誓死守節。禮也。義也。貞也。若侯氏者。洵巾幗丈夫矣。

【音釋】

笄音雞。女子成年曰及笄。○蘇醒也。○篋音愜。箱篋也。○族婦族中婦人也。○無後無子也。

第八章 樂施

代民輸稅。懷仁縣楊秀才妻劉氏。蚤寡。家甚富。聞官司征貧戶稅過嚴。乃詣縣願以家財十萬緡納官。免貧戶稅。遂空其藏七間。三晝夜。錢復滿。

中有木牌曰麻青。觀者駭異。或曰青州麻氏大富。或其家物也。跡之果然。謂積三世錢。一夕失去。劉卽專人詣麻。請復歸之。麻曰。吾家福退。錢歸有德。今復往取。違天逆理。劉曰。我旣輸官。豈宜更有。乃盡施貧人。而家日益富。有孫登第。

貧寒之家。衣食不能自贍。而有司復征以苛稅。民不聊生矣。願輸家財。代貧民輸稅。是真痾療在抱。具已飢已溺之懷者。卒之天佑善人。償以麻氏之錢。家日富饒。子孫登第。擁有資財者。欲守其富。可以劉氏爲法。

【音釋】輸。委輸也。○懷。仁縣有二。一屬山西省。一屬奉天省。蚤與早同。婦人喪夫曰寡。○征。徵稅也。詣。至也。繕。音民。錢貫也。○青州地名。今山東益都縣治。○施。與也。○登第。考試及格之稱。●苛。煩也。○痾。音通。本作恫。痛也。療。音關。病也。書云痾療。乃身。

樂善好施。寧海童釋卿妻羅氏。少喪親。姿端厚。有識度。年十三。歸童氏。時祖姑高年。而舅姑亦老矣。羅氏事之。孝敬雍順。甚得婦道。舅姑喜。家政一任之。祖姑晚病。手足痺不能舉。洩惡或時污牀席。羅氏躬抱持洗滌。飲

食必執匙筋以進。久而不懈。羅氏家爲里正。催民租稅。命減其半。不足。寧出己粟以輸。鄰縣饑。羅氏又出己粟賑之。以爲鄉里率。生平好施予。孤弱不能自存者。給以錢粟。不責其償。爲之娶婦。使成家業者二十餘人。人或告飢。推食以予之。遇人有急。度其事可解。屬諸子爲解之。後或負絕。不與較。家人食指逾千。婢僕食指稱之。察其飢飽苦樂。適其才性所宜。無有怨者。

積財以遺子孫。子孫未必能守。積書以遺子孫。子孫未必能讀。不若積陰德於冥冥之中。方可爲子孫長久計。此司馬溫公之言也。世有畢生勞瘁。以汗血之金錢。供子孫之揮霍者多矣。羅氏澤周鄉黨。好義行仁。而子孫昌盛。積德之言。爲不虛也。世之欲長守其富貴者。宜以溫公之言而三復之。

【音釋】

寧海縣名。今屬浙江省。○匙。調羹也。筋。同箸。○里正。古鄉長之職。○饑。荒年也。穀不熟也。賑。音振。濟也。○率。表率也。○屬。託也。

○食指。喻人口也。●司馬溫公。名光。字君實。宋陝州夏縣人。官至宰相。

曹妝奩路。曹氏明之歛人。項宗義妻也。素性貞靜。居常好義。自歸寧後。見諸橋道崎嶇。行人病涉。慨然請其夫曰。君名宗義。義以何宗。客路踳屨。曷不念諸行者辛勞乎。妾欲變妝奩以坦其橋路。未審君意若何。宗曰。賢哉妻乎。善莫鉅焉。遂共佐以舉其事。積歲而竣其工。羣目之謂曹氏妝奩路。夫亡。氏矢志柏舟。嘗與族人議身後事。慨捐義穀百石。永規項氏宗祠。歲給族內孀嫠。期各以完名節。額其田曰。曹氏頭髻田。契成之日。氏遂坐脫而逝。三日入龕。面如生也。

世謂皇天無親。惟德自親。嘗觀曹氏夫婦。青年仗義。慷慨好施。不以家爲家。竟以德爲家。變妝奩修萬人來往崎嶇之橋路。工竣之後。而夫忽亡。或曰。天道之親胡在。曰。凡夫俗眼。焉知隔世。且不明因果有三。一現報。二生報。三後報。世有造惡。家道反興。前生善因熟也。每有厚德君子。

終身落魄。宿世惡業先報也。明此理。則無怨尤。試問農家父老。寧有蒔稻而獲麻乎。夫好義而早夭者。往劫殺業之感。非好善而驟夭。若不樂善。其齡更促矣。故經云。多殺眾生短命報。彼或再世。受億萬人感激。非我得而知也。曹氏夫亡。矢志柏舟。竊念族內孀嫠。伶仃孤露。擬捨頭髻之田。以完其志。契成之日。竟坐脫而逝。以理推之。其靈定生兜率陀天。受勝妙樂。不復再來人世。天道安得無親乎。人不自知也。

【音釋】玲孀。音林。傅。行不正也。○柏舟。衛太子共伯早死。其妻共姜守婦之有節操者。○接。音釐。婦無夫也。●兜率陀天。欲界諸天之第一。

第九章 婉諫

不索民財。後晉天福十二年。晉主還至晉陽。議索民財。以賞將士。夫人李氏諫曰。陛下因何東創大業。未有以惠澤其民。而先奪其生生之資。殆非新天子所以救民之意也。請索出宮中所有以勞軍。雖復不厚。人無怨

言。晉主從之。中外大悅。

賢德太后 元世祖出獵。道渴。至一帳房。見一女子。緝續也。駝苴駝毛也。世

祖從覓馬潼。馬乳也。女子曰。馬潼有之。但我父母諸兄皆不在。我女子難以

與汝。世祖欲去。女子又曰。我獨居此。汝自來。自去。於理不宜。我父母即歸。

姑待之。須臾果歸。出馬潼飲。世祖。世祖既去。歎息曰。得此等女子爲人家

婦。豈不美哉。後納爲太子妃。性孝謹。善事中宮。世祖每稱爲賢德。事昭睿

皇后。不離左右。執婦道甚謹。及尊爲太后。有獻浙西田七百頃。籍於位下。

太后曰。我寡居婦人。衣食自有餘。況江南率土。皆國家所有。我曷敢私之。

后之弟。欲因后求官。后拒之曰。若欲求官耶。汝自爲之。毋以累我也。

百姓足。君孰與不足。有若一語。足爲千古理財者當頭一棒。後晉以李

妃諫索民財。太后謂江南率土。皆國家所有。曷敢私之。大哉言乎。後世

長國家者。好務財用。卒之民不聊生。盜賊蠡起。而國祚亦隨之而斬。曷

不取太后及李妃之言而三復之。

【音釋】

索求也。○後晉朝代名。天福係晉高祖年號。晉陽地名。今山西太原縣治。賞賜有功也。○陛下係稱天子之謂。東指石敬瑭借

契丹兵由西而東。滅後唐。故謂東創大業。創始也。造也。大業即有天下也。惠恩也。澤恩德也。新天子指初即位之君。○勞慰也。勞軍指慰勞軍士。○元朝代名。世祖名忽必烈。出獵也。道道路也。○太子天子之嫡子。太子妃指太子之嫡室也。中宮皇后也。○昭睿皇后係元世祖之皇后。○浙西浙江之西部。即杭嘉湖等地。頃音傾。上聲。田百畝曰頃。籍戶籍也。公家常徭亦曰籍籍於位下言所獻之田隸於太后也。

諫止征伐 唐貞觀末數調兵討四夷。又營翠微玉華等宮。所費巨億。賢

妃徐惠疏諫曰。今東征高麗。西計龜茲。營繕相繼。服玩華靡。夫以有盡之農功。填無窮之巨浪。圖未獲之他眾。喪已成之我軍。地廣非常安之術。人勞乃易亂之源也。玩珍伎巧。乃喪國之斧斤。珠玉錦繡。實迷心之酖毒。作法於儉。猶恐其奢。作法於奢。何以制後。志驕於業泰。體逸於時安。不可以不遏。上善其言。厚賜之。以上愛民

孟子曰。我善為陣。我善為戰。大罪也。又曰。善戰者。服上刑。兩國戰事。即

幸而勝。而將士之暴骨沙場。人民之肝腦塗地者。已不可勝計。負者更無論矣。兵災所及。繁盛都市。夷爲瓦礫場者。往往數百年。猶未能復舊觀。蓋天下慘酷之事。未有烈於戰爭者也。科學發明。殺人利器。百倍於曩者。其慘酷至不忍道。殺機彌漫。毫無人道。長此以往。苟不幡然覺悟。則人類必有滅絕之時。徐妃諫止征伐。誠知佳兵不祥。千載下猶足企慕其人。

【音釋】

貞觀太宗年號。數音朔。屢次也。討伐也。四夷古時稱四方邊境。未開化之民。曰四夷。東曰夷。南曰蠻。西曰戎。北曰狄。○營造也。

○流條陳也。如奏疏。征謂以兵討之。高麗國名。卽今朝鮮。計謀算也。龜茲漢西域古國名。讀如邱慈。卽今新疆庫車縣地。繕修理也。華華麗靡美也。○有盡卽有限之謂。農功農事也。○酖與鳩通。酖毒言鳩酒有毒能殺人。○遏音遏止也。○上指天子也。●孟子名軻。戰國鄒人。著孟子七篇。○上刑謂上等刑法也。○夷平也。○曩昔也。

勸夫行義。牢氏尙書左丞鍾元章妻也。有賢行。元章號名臣。而性吝嗇。歲獲賜資甚厚。未嘗分遺故人。牢乘間語元章曰。妾昔事君子。家無釜鬻。

止用一鈔。猶且款接賓友。今寶貨盈室。而義路榛塞。卽富貴何足尙也。乃出鈔以示元章。元章大慚。自是稍稍揮散矣。

儉爲美德。然可以儉於己。而不可儉於人。若旣已擁有厚貲。富貴福澤。天所以厚我之生。宜分其所餘以濟鄰里鄉黨。世之知積而不知散者。所謂鄙吝之極。必生奢男。徒爲子孫作馬牛耳。牢氏謂寶貨盈室。而義路榛塞。卽富貴何足尙。至哉言乎。

【音釋】尙書左丞官名。○吝嗇鄙惜也。○貲音賧。賜予也。故人謂舊日之小而有柄有流者。○榛音真。榛寒。謂聚木塞止也。尙猶美也。

藉婢規夫 王藻爲府刑官。每日持金入。妻疑其枉法所得。因遣婢送豬蹄十臠。俟藻入。乃詐稱十三臠。藻以婢竊食。怒甚。笞之。婢不勝痛。乃誣服。妻曰。君日持金入。我疑君鍛鍊得之。姑以婢相試。今果然矣。不義之財。必有凶報。願今後勿爲此。藻聞言。悚然大悟。汗流浹背。因題詩曰。枷拷追來

只爲金轉增冤孽罪何深。從今不願顧刀筆。放下歸來遊竹林。卽罄所有散施。棄家學道。後成仙。

三木之下。何求不得。司刑獄者。又大都好深文周內。此歐陽公所以有世常求其死之嘆也。藻妻故以肉試藻。而婢竟誣服。以是而推。世間囹圄中含冤負屈者。不知凡幾也。然則聽訟者。宜仁厚周慎。萬不可掉以輕心而徒事刑求也。

【音釋】藉借也。規以法正人也。○府刑官。官名。掌府中刑法之稱。枉。屈也。○齧肉之切成塊者。○笞。捶擊也。○鍛鍊。凡金類之物。以火燒之。使成熟。喻以嚴刑逼罪人也。○悚懼也。○枷。拷獄具也。○刀筆。書吏之掌案牘者。●三木。古刑具。以械頸及手足者。○歐陽公。名修。宋仁宗時江西廬陵人。善文章。○囹圄。獄也。

片語悟夫。許允妻阮氏。賢明而醜。允始見愕然。交禮畢。無復入意。朋友勸之入闔。須臾便起。妻留之。允顧曰。婦有四德。卿有其幾。婦曰。新婦所乏者惟容。士有百行。君有其幾。允曰。皆備。婦曰。百行以德爲首。好色不好德。

何謂皆備。允有慚色。知其非凡。遂雅相親重。

夫婦之道。所以承宗祧奉祭祀。故擇婦者。重德而不可重色。然世之擇婦者。往往反是。以許允之賢。猶以其妻貌寢而不悅。聞阮氏一言。始爽然自失。古人有言。夫婦能相警戒。則家道以成。此詩人所以賦鷄鳴也。

【音釋】

悟音誤。啓發人之知覺也。○許允。見世說。阮氏是阮衛尉女。德如妹。奇醜。醜貌惡也。○愕然。驚貌。○閭。婦女所居處也。○四德。

一曰婦德。二曰婦言。三曰婦容。四曰婦功。○容。容貌也。○慚。羞愧也。○宗祧。猶言宗廟。○貌寢。容貌醜惡也。○雞鳴。見詩經。

歌諷奢侈。舊桃寇萊公妾也。姿色豔麗。靈淑能詩。公嘗設宴。令集諸妓。賞綾綺千數。舊桃獻詩二絕云。一曲清歌一束綾。美人猶自意嫌輕。不知織女寒窗下。幾度拋梭織得成。風動衣單手屢呵。幽窗軋軋轉機梭。天寒日短不盈尺。何似妖姬一曲歌。公和之曰。將相功名終若何。不堪急景似奔梭。人間萬事何須問。且向廳前聽豔歌。及公貶嶺南。道經杭州。舊桃疾。謂公曰。妾必不起。卒葬我於天竺山下。公驚哀不已。舊桃復曰。相公宜自

愛亦非久居人世者。已而公卒於雷州。今舊桃墓在天竺。以上勸崇德

萊公宋代名臣。功在社稷。惟性好豪侈。爲白璧之瑕。而當時僚佐賓朋。不聞以正言規諫。獨其妾以歌諷勸。其識見加人一等矣。二詩委婉。讀之令人生惜物之心。公不能從。致罹遣謫。惜哉。

【音釋】

諷謂不用正言。託辭以感人也。○舊音倩。寇萊公名準。字平仲。宋華州人。真宗時官至同平章事。後貶雷州。仁宗時封萊國公。

○織女。星名。天女也。○天竺山。在浙江杭州縣靈隱寺飛來峯之南。●瑕。音霞。過也。○謫。音摘。罰也。

孝智兼全 鄭瑛年方十二。見母虐嫂。愛已。每食以殘穢者與嫂。嘉美者與已。瑛每私分甘與嫂。一日母見嫂食美。欲撻嫂。嫂告以小姑私與之母。怒詈女。女跪泣曰。女後日適人。倘遇姑如母者。母心安否。母悟。遂轉慈焉。里人稱孝智兼全云。此諫母仁慈

家庭姑嫂之間。易於參商。蓋母之愛媳。總不若其愛女之摯。衣服飲食。不能無所軒輊。畛域既分。意見遂起。爲小姑者。苟人人能如鄭瑛。則天

下無不睦之姑嫂。亦無不睦之姑媳矣。其調劑之苦心。諫母之婉切。才識見解。迥非恆流所及。孝智兼全。良非虛譽。

【音釋】

虐。殘暴也。○撻。打也。○小姑。夫之妹也。○詈。音荔。罵也。●畛。域界限也。

第十章 孝行

冬月生桃。高郵韋氏。吳玳妻。事姑最孝。姑病危。剗肱肉愈之。後姑染寒病。七日不汗。醫者謂必死。忽思食桃。時當十月。桃不可得。氏於家園桃樹下拜哭不已。忽花敷滿樹。竟結一實。姑食之復愈。後遭倭變。民居悉爲火焚。倭入其家。知爲孝婦家。贈以羊酒。削木。柱書曰。此孝婦家不可犯。隆冬產麥。定陶焦孝女。家貧甚。父早喪。與母居。性純慤。事母至孝。母疾。思食麥。女遍叩弗得。時隆冬甚寒。女號哭於郊。竟日不輟。麥倏成穗。取歸以食母。母病遂瘳。時人謂孝感所致。

卉木無知者也。孝念所感。冬月可以生桃。隆冬可以產麥。則以植物之

無知。猶且感其孝思而爲之效靈。不特蠢動含靈。皆有佛性。虎狼衛墓。烏鵲銜泥。實尋常事。觀乎此。則孝之一念。誠可以光四海而無所不通矣。至遭寇變。民居被焚。知爲孝婦。贈以羊酒。相戒不犯。則曩昔兵革之時。公道尙在人心。今則求如二女者。固不可得。而焚殺之慘。閭里爲墟。玉石同燼。以今概昔。真不勝世道人心之憂矣。

【音釋】高郵。今屬江蘇省。○割。割也。○染。如疫病延及他人之謂。○實。果也。○倭變。卽倭寇。明嘉靖時。寇東南浙閩等省。●定陶。今屬山東省。○慤。音樞。謹也。○瘳。音秋。愈也。

大士佑孝 羅柏舟者。胡侍御之女。羅雙湖之妻。懋明之母也。幼貞淑。凝靜。侍御每奇之。爲擇雙湖配焉。歸雙湖僅八年。湖病卒。遺姑六十有奇。懋明甫三歲。父母慮其年少而難於守。有議焉。柏舟仰天曰。夫婦之義。刻骨不可忘。再醮之羞。掬海不可洗。吾之所以不卽死者。以堂上白髮無所仰。而膝下黃口無所乳哺也。侍御聽之。爲改容。柏舟竟儉約辟績。足不出門。

戶者。終身如一日也。姑嘗病喘絕。獨心腕中微熱。柏舟不忍殮。越二日。夜三鼓盡。恍惚間夢一金衣神語之曰。汝姑無恙矣。適閻帝遣之歸。後十五年當去。驚覺。視姑鼻有微息。亟取湯潤之。過堂上。見燈霧濛濛。儼如夢中景狀。蓋夢中與語者。卽其素所信事金身觀世音也。姑竟愈。懋明補邑庠。隆慶初。有司南昌縣侯嚴錫扁曰柏舟高節。里閭號曰迎湖羅柏舟。蓋借其地而言也。●金氏邑庠生孫復儒妻。年十六歸復儒。嫡母性嚴。氏承事。曲爲調護。越七載夫亡。姑亦卽世。家貧翁老。守節以養。翁病劇。親調湯藥。六十晝夜目不交睫。焚香大士前。刲股爲丸以進。是夕翁忽起曰。吾病愈矣。昨夢一白衣女子曰。汝媳誠孝動天。增壽一紀。後果符其數。合邑請旌。觀音大士尋聲救苦。苟能誠心以求。其感應之捷。如響斯應。至於忠臣孝子。義夫節婦。爲天地鬼神所欽敬。呵護之力。視恆常之人爲尤有加。柏舟年少誓志。上事白頭之姑。下撫黃口之兒。苦節艱貞。天人欽敬。至

姑死不忍殮。冀其復蘇。苦心孤詣。今古希有。而大士乃如其意以報之。卒延姑壽。至孝所感。足以風世。

【音釋】

也。○侍御。御史通稱。○貞淑。謂正而靜也。凝靜。謂定而幽也。○甫。僅

仰事。即上事翁姑也。黃口。小兒也。○辟績。辟紗紡績也。○閭帝。俗謂閭

羅也。○隆慶。明穆宗年號。南昌。縣名。今屬江西。○閨音翰。里門也。●即

世去世也。○交睫。謂合眼也。●風世。勸世也。

篤誠格天。葉烈女。唐時歛人也。幼孤。鞠於叔母。叔父爲縣吏。坐逋官錢五十萬。繫獄。女以香置頂。自灼。從昏達旦。獄官夢帝命。使審其獄。乃悉前吏所負。遂得釋之。叔母有疾。女晝夜籲天。割股以進。病頓瘳。後叔父母相繼逝。女負土成墳。輒於墓所。葺草爲庵。供奉大士。茹苦精誠。憶佛念佛。以終其志。後於終時。預知時至。身無病惱。安詳而化。囑家人以僧禮焚之。有骨綴舍利無數。眾感其貞烈。遂捐資建塔。於縣治之側。表其不朽云。歿年八十有一。

葉氏至孝。置香自灼。但知有父。不知有身。是以冥感帝心。遂釋父冤。至於割股以瘳母疾。亦篤誠格天。父母繼亡。積土成墳。輒於墓所結草庵。奉佛以終其志。何等毅烈。何等高尙。所以享耄壽。而預知其終。焚身舍利。鱗砌者。性德與修德之所感也。今之人。爭名競利。臨死時。手忙脚亂。一靈未知所自。何若氏之貞操。去來得以自若也。

【音釋】

通音哺。欠也。○葺音緝。以草覆屋也。○舍利。火化後。結成似珠玉之物。●耄。八十九曰耄。

骨化爲金。唐敬宗時。撫州金谿葛祐。爲金谿監銀場吏。時鑛盡。歲額盡虧。傾家無以償。拷掠幾死。祐無子。二女至孝。不忍見父之苦。乃相與發誓。願以身代死。明日果同躍入冶中。俄有陰靈四起。烈風雷雨如晦。眾皆驚怖。卽發鑛取其骨。已化爲白金矣。有司遂釋其父。並聞於朝。詔旌之。官爲立祠。鄉民水旱疾疫。必往禱焉。甚著靈異。君子謂葛祐二女。以身紓父之急。

孝子事親。祇知有親。而不知有身。故雖極困苦艱難之事。在孝子無不可以順受。且祇覺其可樂。而不覺其苦。而此一念之純孝。可以格蒼穹。可以驚鬼神。可以廟食千秋。二女不忍其父拷掠。投身治中。冀免父死。至骨化爲金。父罪得宥。有司爲之立祠。水旱疾疫往禱必應。諺謂忠臣孝子。歿而爲神。於此益信。

【音釋】

撫州府名。今江西臨川縣。卽舊府治也。金谿縣名。今屬江西省。○冶音現。鎔也。鑄也。●蒼穹謂青天也。

孝延姑壽 蘇州城隍廟。乾隆間。有道士袁守中者。杭州袁春圃之族裔也。工詩詞。善小楷。其徒皆敬畏之。有某徒私出遊山。半夜始歸。不敢扣院戶。卽坐堂上假寐。逾時。聞一鬼曰。奉牒拘某婦。乃戀其病姑。念念固結。神不離舍。不能攝取。柰何。一鬼答曰。精誠固結。以戀病姑。此孝婦也。與強魂捍拒者不同。不可率拘。宜稟請上帝。議延其壽。慎勿孟浪。語畢。似潛入內殿去。卽寂然。

孝爲百行原。故人子能孝其親。則神靈衛之。眾邪遠之。史傳所載。不一而足。某婦以戀其病姑之一念。精誠固結。鬼不敢近。至稟請上帝。議延其壽。夫人孰不欲壽考康寧。苟能力行孝道。可以不求而得。爲人子者。可以憬然悟矣。

【音釋】

蘇州地名。今江蘇吳縣治。乾隆清高宗年號。杭州地名。今浙江杭縣治。工能也。善猶工也。徒弟子之謂。院戶係指廟之院

戶。○牒音疊。文書也。拘音珠。執也。攝音失。引持也。○捍音猛。烈也。拒禦也。○率音輕。遑貌。上帝謂天帝也。孟浪猶冒昧也。○潛音漸。藏也。

至孝驚天

淮安山陽縣毛繼宗妻馮氏。天性至孝。姑年高病篤。毛又運

糧赴京。婦乃沐浴更衣。夜晚籲天代死。取刀刺脅。肝尖躍出。忽聞兒呼。恐驚姑醒。遂以帕揜刀口。入撫其兒。復慮微肝不足。愈姑。虔禱再剖。時月尙未出。天忽明淨。星皆燦爛。照婦之身。光如白日。婦復剖肝一段。當卽和羹進姑。姑甫嘗。便覺甘美。問是何物。婦詭言鄰家獲一鹿。此鹿肝也。姑食之。病隨愈。彼時至誠所感。剖口不痛。但血跡難揜。小姑覺之。合家驚傳。姑方

知其救己也。痛哭感恤之。時爲明崇禎五年三月二十二日。有新安諸生江天一著奇孝驚天集。以傳其事。

人之與天。相去至遠者形也。至近者心也。一念之善惡。天必知之。孝子之心。祇知有親而不知有身。苟能療親疾。雖糜爛其軀。而亦所甘心。割股。割肝。人以爲愚孝。其實非愚孝也。發於良能中之至愛而然。其愛親之念。至真至切。雖金石不足喻其堅。至誠未有不動者。故往往天之感應。亦出恆理之外。奇孝驚天。理有必至。事所必有。世或以爲怪誕者。烏足以知天人之道。

【音釋】

淮安府名。山陽縣名。今屬江蘇。淮安縣。○年高病篤。謂年老病危也。赴京。往京師也。○虔。音乾。敬也。禱。音倒。告事求福於神也。

割。音奎。割也。○詭。音癸。詐也。○崇禎。明思宗年號。新安。部名。今屬安徽休寧歙二縣。諸生。秀才也。江天一。安徽歙縣人。明末殉國難。

割股愈親。民國黑龍江省立女子師範學生郭鳳琴。事母孝。母臥病數年。醫治不愈。女奉侍殷勤。隱憂情切。聞人言割股可以療疾。因割左臂肉。

一塊作湯一碗。被母聞知。慘不忍食。越日不令母知。復割左股肉。作食奉母。食後果大嘔吐。而病立愈。以上孝感。

剗股療親。所謂愚孝而不可爲訓者。然人子目覩生我撫我者。呻吟牀蓐。奄奄待斃。苟能起其痼疾。雖摩頂放踵。亦所甘心。更何有於區區一臠之肉。此志乘所載。剗股療親者。所以指不勝縷也。近世孝道日衰。而黑龍江師範女子乃能有此。誠庸中佼佼者矣。爰特錄之。

【音釋】股。音古。大腿。至膝曰股。○黑龍江省名。○療。治也。●有疾病而發聲者曰呻吟。牀。臥具也。奄。奄。氣息僅續也。痼疾。久病也。摩頂放踵。見孟子。謂摩突其頂下至於踵。○志乘。謂記載之書。○庸中佼佼。漢光武語。佼佼。好貌。

願代父死 羅有恆。爲泰州司李。居官頗廉。惟賦性拘執。憚於改過。時有大盜殺人劫財。羅責捕嚴拏。已經就獲。庭訊時。盜攀其仇家富室臧姓。臧姓號稱冤。羅不聽。比爲從律擬絞。上司報可。臧有女桂姐。刺臂血具詞。願代父死。羅不聽。後雖訪知其冤。緣讞案已定。不肯自認失察之罪。遂置之。

法。臧被決時。其女抱父屍一慟而絕。羅任滿。改四川司李。畏遠不赴。告病歸里。因無子。囑媒娶妾。有韓媪云。近有臧姓新亡。遺女十七歲。無所歸。情願爲宦家姬侍。羅用五十金買之。見其女容色可人。應對安雅。大喜。是晚成親。女闔戶。家人聞房內羅求饒之聲。大駭。又聽女云。我乃孝女。蒙上帝封爲貞靜夫人。豈肯與汝爲妾。汝向日無辜害吾父。今來取汝赴陰司質對。求饒何益。眾將門撞開。見羅已七竅流血死矣。女無蹤跡。蓋桂姐之靈也。後訪韓媪。並無其人。亦係鬼云。

伏闕鳴冤 明山陰諸娥。父士吉。犯法論死。時娥方八齡耳。日夜痛哭。從其舅某往南京。伏闕臥釘板。鳴冤。帝憐其孝。赦其父。後以重傷殞命。崇祀曹廟。奕世旌揚。以上救父

酷吏羅織。銜冤莫白。援救無人。九重深邃。下情又莫由上達。當此之時。誠萬死一生。間不容髮。而一則願代父死。一則伏闕鳴冤。至性所發。奮

不顧身。於是朝廷感其孝義。上帝憫其孤苦。父罪得赦。父冤亦報。之二
女之天性純孝。足以媲美緹縈矣。

【音釋】○秦州。今江蘇泰縣。司李。即司理。掌刑法之官。○拘執。固執之謂也。

○四川省名。○闔戶。閉戶也。○無辜。無罪也。陰司。冥司也。質對。互相對

訊也。●伏闕。伏於天子之門也。○南京。即金陵。明時首都。今亦首都。○曹

廟。即曹娥廟。奔世。謂累代也。●階吏。謂嚴刑峻法之官吏也。羅織。謂誣

罔無罪者。以成其罪也。○九重。指人君所居之地。○緹縈。漢文帝時孝

附錄

女誠

後漢班昭

鄙人愚暗。受性不敏。蒙先君之餘寵。賴母師之典訓。年十有四。執箕帚
於曹氏。今四十餘載矣。戰戰兢兢。常懼黜辱。以增父母之羞。以益中外
之累。是以夙夜劬心。勤不告勞。而今而後。乃知免耳。吾性疏愚。教導無
素。恆恐子穀。負辱清朝。聖恩橫加。猥賜金紫。實非鄙人庶幾所望也。男

能自謀矣。吾不復以爲憂。但傷諸女方當適人而不漸訓誨。不聞婦禮。懼失容他門。取恥宗族。吾今疾在沉滯。性命無常。念汝曹如此。每用惆悵。因作女誡七篇。願諸女各寫一通。庶有補益。裨助汝身去矣。其勸勉之。

卑弱第一 古者生女三日。臥之牀下。弄之瓦甃。而齋告焉。臥之牀下。明其卑弱。主下人也。弄之瓦甃。明其習勞。主執勤也。齋告先君。明當主繼祭祀也。三者蓋女人之常道。禮法之典教矣。謙讓恭敬。先人後己。有善莫名。不自矜夸。有惡莫辭。不自矜夸。不自飾非。忍辱含垢。常若畏懼。卑弱下人也。晚寢早作。不憚夙夜。執務私事。不辭劇易。所作必成。手跡整理。是謂執勤也。正色端操。以事夫主。清靜自守。無好戲笑。潔齊酒食。以供祖宗。是謂繼祭祀也。三者苟備。而患名稱之不聞。黜辱之在身。未之見也。三者苟失之。何名稱之可聞。黜辱之可遠哉。

夫婦第二 夫婦之道。參配陰陽。通達神明。信天地之弘義。人倫之大節也。是以禮貴男女之際。詩著關雎之義。由斯言之。不可不重也。夫不賢。則無以御婦。婦不賢。則無以事夫。夫不御婦。則威儀廢缺。婦不事夫。則義理墮闕。方斯二者。其用一也。察今之君子。徒知妻婦之不可不御。威儀之不可不整。故訓其男。檢以書傳。殊不知夫主之不可不事。禮義之不可不存也。但教男而不教女。不亦蔽於彼此之數乎。禮八歲始教之書。十五而至於學矣。獨不可以此爲則哉。

敬順第三 陰陽殊性。男女易行。陽以剛爲德。陰以柔爲用。男以強爲貴。女以弱爲美。故鄙諺有云。生男如狼。猶恐其_音疋。_{汪瘦}生女如鼠。猶恐其

虎。_{惟恐}然則修身莫如敬。避強莫若順。故曰。敬順之道。婦之大禮也。夫敬

非他。持久之謂也。夫順非他。寬裕之謂也。持久者。知止足也。寬裕者。尙恭下也。夫婦之好。終身不離。房室周旋。遂生媾黷。_{音雪獨狎}媾黷既生。語言

過矣。語言既過，縱恣必作。縱恣既作，則侮夫之心生矣。此由於不知止足者也。夫事有曲直，言有是非。直者不能不爭，曲者不能不訟。訟爭既施，則有忿怒之事矣。此由於不尙恭下者也。侮夫不節，譴呵從之。忿怒不止，楚撻從之。夫爲夫婦者，義以和親，恩以合好。楚撻讀如塔打也，既行，何義之存。譴呵既宣，何恩之有。恩義俱廢，夫婦離矣。

婦行第四 女有四行。一曰婦德，二曰婦言，三曰婦容，四曰婦功。夫云婦德，不必才明絕異也。婦言，不必辯口利辭也。婦容，不必顏色美麗也。婦功，不必工巧過人也。幽閒貞靜，守節整齊，行已有恥，動靜有法，是謂婦德。擇辭而說，不道惡語，時然後言，不厭於人，是謂婦言。盥浣音管緩，皆洗也，塵穢，服飾鮮潔，沐浴以時，身不垢辱，是謂婦容。專心紡績，不好戲笑，潔齊酒食，以奉賓客，是謂婦功。此四者，女人之大節，而不可乏者也。然爲之甚易，唯在存心耳。古人有言：仁遠乎哉，我欲仁而仁斯至矣。此之謂也。

專心第五 禮。夫有再娶之義。婦無二適之文。故曰。夫者。天也。天固不可

逃。夫故不可也。行違神祇。天則罰之。禮義有愆。夫則薄之。故女憲曰。得

意一人。得夫之意。是謂永畢。和諧畢世。失意一人。失夫之意。是謂永訖。訖。止也。夫婦乖由

斯言之。夫不可不求其心。然所求者。亦非謂佞媚苟親也。固莫若專心正

色。禮義居潔。耳無妄聽。目無邪視。出無冶容。入無廢飾。無聚會羣輩。無看

視門戶。此則謂專心正色矣。若夫動靜輕脫。視聽陝輸。不定貌。入則亂髮壞

形。出則窈窕作態。說所不當道。觀所不當視。此謂不能專心正色矣。

曲從第六 夫得意一人。是謂永畢。失意一人。是謂永訖。欲人定志專心

之言也。舅姑之心。豈當可失哉。物有以恩自離者。有恩於人。人反離之。亦有以義自

破者也。夫雖云愛舅姑云非。此所謂以義自破也。然則舅姑之心。柰何固

莫尚於曲從矣。姑云不同否爾。而是固宜從令。姑云是爾而非。猶宜順命。勿

得違戾是非。爭分曲直。此則所謂曲從矣。故女憲曰。婦如影響。順從舅姑。如影隨形。

焉不可賞。

和叔妹第七 婦人之得意於夫主。由舅姑之愛己也。舅姑之愛己。由叔妹之譽己也。由此言之。我之臧否毀譽。一由叔妹。叔妹之心。復不可失也。人皆莫知叔妹之不可失。而不能和之以求親。其蔽也哉。自非聖人。鮮能無過。故顏子貴於能改。仲尼嘉其不貳。而況婦人者也。雖以賢女之行。聰哲之性。其能備乎。是故室人和。則謗掩。內外離。則過揚。此必然之勢也。易曰。二人同心。其利斷金。金可以截同心之言。其臭也。氣也如蘭。此之謂也。夫叔妹者。體敵而分尊。恩疎而義親。若淑媛謙順之人。則能依義以篤好。崇恩以結援。使徽美顯彰。而瑕過隱塞。舅姑矜善。而夫主嘉美。聲譽曜於邑鄰。休美善也光延於父母。若夫蠢愚之人。於叔則託名以自高。於妹則因寵以驕。盈驕盈既施。何和之有。恩義既乖。何譽之臻。是以美隱而過宣。姑忿而夫慍。毀訾音子。謗言也布於中外。恥辱集於厥身。進增父母之羞。退益君子之累。

斯乃榮辱之本。而顯揚否之基也。可不慎歟。然則求叔妹之心。固莫尙於謙順矣。謙則德之柄。順則婦之行。知斯二者。足以和矣。詩曰。在彼無惡。在此無射。此之謂也。

女論語傳

唐宋若昭

王夔立云。史載若昭之姊若莘。著女論語十二篇。體仿孔門問答。若昭爲傳申釋之。夫若昭之傳。旣以釋若莘之書。當爲箋疏注也之體。今世所傳女論語。署爲若昭所作。以韻文直抒己意。與史不符。恐屬後人依託。顧其詞理。極爲明備。實教女者所必需。故錄入本書。但易其題曰女論語傳。而撰人之名。姑仍若昭之舊。以其體例迥異。若莘之原書。而於若昭之傳。猶可強附也。覽者勿以抵牾音誤。抵觸也。爲疑焉。

立身章第一 凡爲女子。先學立身。立身之法。首務清貞。清則身潔。貞則身榮。行莫回頭。語莫掀唇。坐莫動膝。立莫搖裙。喜莫大笑。怒莫高聲。內外

各處男女異羣。莫窺外壁。莫出外庭。男非眷屬。莫與通名。女非善淑。莫與相親。立身端正。方可爲人。

學作章第二 凡爲女子。須學女工。紉麻緝苧。粗細不同。車機紡織。切勿_{急也}。看蠶煮繭。曉夜相從。採桑摘柘。看雨占風。滓溼卽替。寒冷須烘。取葉飼食。必得其中。取絲經緯。丈疋成工。輕紗下軸。細布入筒。綢絹苧葛。織造重重。亦可貨賣。亦可自縫。刺鞋作襪。引線繡絨。縫聯補綴。百事皆通。能依此語。寒冷從容。衣不愁破。家不愁窮。莫學懶婦。積小癡慵。不勤女務。不計春冬。針線粗率。爲人所攻。嫁爲人婦。恥辱門風。衣裳破損。牽西遮東。遭人指點。恥笑鄉中。奉勸女子。聽取言忠。

學禮章第三 凡爲女子。當知禮數。女客相過。安排坐具。整頓衣裳。輕行緩步。斂手低聲。請過庭戶。問候通時。從頭稱敘。答問殷勤。輕言細語。備辦茶湯。迎來送去。莫學他人。擡身不顧。接見依稀。若相欺侮。如到人家。當知

女務相見傳茶。卽通事故。說罷起身。再三辭去。主若相留。禮筵待遇。酒略沾脣。食無叉筋。退盞辭壺。過承推拒。莫學他人。呼湯呷醋。醉後顛狂。招人怨惡。當在家庭。少遊道路。生面相逢。低頭看顧。莫學他人。不知朝暮。走徧鄉村。說三道四。引惹惡聲。多招罵怒。辱賤門風。連累父母。損破自身。供他笑具。如此之人。有如犬鼠。

早起章第四 凡爲女子。習以爲常。五更雞唱。起著衣裳。盥漱已了。隨意梳妝。揀柴燒火。早下廚房。摩鍋洗鏊。煮水煎湯。隨家豐儉。蒸煮食嘗。安排蔬菜。炮鼓讀如侍以豆製成之食物。春菑。隨時下料。甜淡馨香。整齊碗碟。鋪設分張。三餐飲食。朝暮相當。莫學懶婦。不解思量。日高三丈。猶未離床。起來已晏。却是慚惶。未曾梳洗。突入廚房。容顏醜。手脚慌忙。煎茶煮飯。不及時常。又有一等。舖餒爭嘗。未曾炮饌。先已偷藏。醜呈鄉里。辱及爺娘。被人傳說。豈不羞惶。

事父母章第五 女子在堂。敬重爺娘。每朝早起。先問安康。寒則烘火。熱則扇涼。饑則進食。渴則進湯。父母檢責。不得慌忙。近前聽取。早夜思量。若有不是。改過從長。父母言語。莫作尋常。遵依教訓。不可強梁。若有不諳。細問無妨。父母年老。朝夕憂惶。補聯鞋襪。做造衣裳。四時八節。孝養相當。父母有疾。身莫離床。衣不解帶。湯藥親嘗。禱告神祇。保佑安康。設有不幸。大數身亡。痛入骨髓。哭斷肝腸。劬勞罔極。恩德難忘。衣裳裝殮。持服居喪。安埋設祭。禮拜家堂。逢周遇忌。血淚汪汪。莫學忤逆。不敬爺娘。纔出一語。使氣昂昂。需索陪送。爭競衣裝。父母不幸。說短論長。搜求財帛。不顧哀喪。如此婦人。何異豺狼。

事舅姑章第六 阿翁阿姑。夫家之主。既入他門。合稱新婦。供承看養。如同父母。敬事阿翁。形容不靚。不敢隨行。不敢對語。如有使令。聽其屬付。姑坐則立。使令便去。早起開門。莫令驚忤。灑掃庭堂。洗濯巾布。齒藥肥皂。溫

涼得所。退步階前。待其浣洗。萬福一聲。

口稱之
祝詞

卽時退步。整辦茶盤。安排

匙筯。香潔茶湯。小心敬遞。飯則軟蒸。肉則熟煮。自古老人。齒牙疏蛀。茶水羹湯。莫教虛度。夜晚更深。將歸睡處。安置相辭。方回房戶。日日一般。朝朝相似。傳教庭幃。人稱賢婦。莫學他人。跳梁可惡。咆哮尊長。說辛道苦。呼喚不來。饑寒不顧。如此之人。號爲惡婦。天地不容。雷霆震怒。責罰加身。悔之無路。

事夫章第七 女子出嫁。夫主爲親。前生緣分。今世婚姻。將夫比天。其義非輕。夫剛妻柔。恩愛相因。居家相待。敬重如賓。夫有言語。側耳詳聽。夫有惡事。勸諫諄諄。莫學愚婦。惹禍臨身。夫若出外。須記途程。黃昏未返。瞻望相尋。停燈溫飯。等候敲門。莫學懶婦。先自安身。夫如有疾。終日勞心。多方問藥。徧處求神。百般治療。願得長生。莫學蠢婦。全不憂心。夫若發怒。不可生嗔。退身相讓。忍氣低聲。莫學潑婦。鬪鬧頻頻。粗絲細葛。熨貼縫紉。莫教

寒冷凍損夫身。家常茶飯。供待殷勤。莫教饑渴。瘦瘠苦辛。同甘同苦。同富同貧。死同葬穴。生共衣衾。能依此語。和樂瑟琴。夫婦和好也。如此之女。賢德聲聞。

訓男女章第八 大抵人家。皆有男女。年已長成。教之有序。訓誨之權。亦在於母。男入學堂。請延師傅。習學禮儀。吟詩作賦。尊敬師儒。束脩酒脯。女處閨門。少令出戶。喚來便來。喚去便去。稍有不從。當加叱怒。朝暮訓誨。各勤事務。掃地燒香。紉麻緝苧。若在人前。教他禮數。莫縱嬌癡。恐他啼怒。莫縱跳梁。恐他輕侮。莫縱歌詞。恐他邪污。莫縱遊行。恐他惡事。堪笑今人。不能爲主。男不知書。聽其弄齒。骰子賭具。鬪鬧貪杯。謳歌習舞。官府不憂。家鄉不顧。女不知禮。強梁言語。不識尊卑。不能針指。辱及尊親。有玷父母。如此之人。養豬養鼠。

營家章第九 營家之女。惟儉惟勤。勤則家起。懶則家傾。儉則家富。奢則

家貧。凡爲女子。不可因循。一生之計。惟在於春。一日之計。惟在於寅。奉箕擁帚。灑掃灰塵。撮除邈邈。不潔也。潔靜幽清。眼前爽利。家宅光明。莫教穢污。有玷門庭。耕田下種。莫怨辛勤。炊羹造飯。饋送頻頻。莫教遲慢。有誤工程。積糠聚屑。喂養孳牲。呼歸放去。檢點搜尋。莫教失落。擾亂四鄰。夫有錢米。收拾經營。夫有酒物。存積留停。迎賓待客。不可偷侵。大富由命。小富由勤。禾麻菽麥。成棧成囤。油鹽椒豉。盎甕裝盛。豬雞鵝鴨。成隊成羣。四時八節。免得營營。酒漿食饌。各有餘盈。夫婦享福。懽笑欣欣。

待客章第十 大抵人家。皆有賓主。洗滌壺瓶。抹光桌子。準備人來。點湯遞水。退立堂後。聽夫言語。細語商量。殺雞爲黍。五味調和。菜蔬齊楚。茶酒清香。有光門戶。紅日含山。晚留居住。點燭擎燈。安排臥具。欽敬相承。溫涼得理。次曉相看。客如辭去。酒飯殷勤。一切周至。夫喜能家。客稱曉事。莫學他人。不持家務。客來無湯。慌忙失措。夫若留人。妻懷嗔怒。有筯無匙。有鹽

無醋。打男罵女。爭餒爭哺。夫受慚惶。客懷羞懼。有客到門。無人在戶。須遣家童。問其來處。當見則見。不見則避。敬待茶湯。莫缺禮數。記其姓名。詢其事務。等得夫歸。卽當告訴。奉勸後人。切依規度。

和柔章第十一 處家之法。婦女須能。以和爲貴。孝順爲尊。翁姑瞋責。小心敬聽。上房下戶。子姪宜親。是非休習。長幼休爭。從來家醜。不可外聞。東鄰西舍。禮數周全。往來動問。款曲周旋。一茶一水。笑語忻然。當說則說。當行則行。閒是閒非。不入我門。莫學愚婦。不問根源。穢言粗語。觸突尊賢。奉勸女子。量後思前。

守節章第十二 古來賢婦。九烈三貞。名標青史。傳到如今。後生宜學。勿曰難行。第一貞節。神鬼皆欽。有女在室。莫出閨庭。有客在戶。莫露聲音。不談私語。不聽邪音。黃昏來往。秉燭掌燈。暗中出入。非女之經。一行有失。百行無成。夫妻結髮。義重千金。若有不幸。中路先傾。三年重服。守志堅心。保

家持業。整頓墳塋。殷勤訓子。存歿光榮。此篇論語。內範儀形。後人依此。女德昭明。幼年切記。不可朦朧。若依此言。享福無窮。

戒殺放生。爲修福積善之最妙法門。每見旱災之際。眾民發心斷屠。則甘澍立降。此其驗也。故欲家庭興旺。當以戒殺爲先。若昭若明。是理決不於九十兩篇。說鵝鴨成羣。殺雞爲黍之言。讀者須善會之。

女德篇跋

戊寅臘月。余方避亂於徐家匯。承太平寺真公老和尚之囑。任校女德篇。披閱之後。不禁悲喜交集。所悲者。現今大亂之世。飛機炸彈。大砲毒氣。所殺人民。不知其幾百千萬也。而大殺之後。盜賊蠶起。匪徒徧地。此搶彼奪。所損失之財物。更不知其幾百千萬也。乃在此亂離之中。殺人強搶。固已盡其慘酷。而禽獸行爲。更隨時隨地。可以耳聞。可以目見。無數婦女。時被

污辱。時被劫掠。破人貞節。壞人名譽。其爲無禮。無義。無廉。無恥。一至於此。各種慘況。在昔年只見書報之記載。只聞師友之傳說而已。已足令人不寒而慄。而今均爲之親身經歷。心爲之碎。膽爲之裂。倖而得免一死。蓋亦萬幸矣。此蓋所以悲也。而真公老和尚。及德森大師。方在租界之上。安全區中。仗其無畏之精神。孜孜矻矻。編印佛善書籍。冀以文字之般若。普徧十方。流傳萬世。挽既倒之狂瀾。醒眾生之迷夢。更編印女德。提倡閨教。各章所載。均錄自古來史乘。信而有徵。且每節加以按語。注以音釋。使嘉言懿行。益爲明顯。疑字難句。完全明晰。篇末再附以女誠。及女論語傳。將應法應戒之事理。條分縷析。誠所謂事理圓融矣。足使見者聞者。同生景仰之心。若母若女。咸知立身之道。賢者有所遵則。而不賢者亦知警惕焉。如此則能不歡喜而讚嘆乎。余因思及一切遭遇。無非前因後果。卽現世刀兵之劫。亦由殺業而來。願雲禪師有偈云。千百年來。怨深如海恨。

難平。欲知世上刀兵劫。但聽屠門夜半聲。故彌天浩劫。早在往昔種。因今惟開花結果耳。吾人處於其中。不必怨天。不必尤人。正當借此時機。懺悔一切。自能化干戈爲玉帛。卽戾氣爲祥和焉。余今旣任校字之役。因願仗此功德。消除宿業。回向西方。并願篇中各賢婦女。未生淨土者。卽生淨土。已生淨土者。蓮品轉高。更願現世之見聞是書者。令其妻女。同爲賢善。并發菩提之心。深信切願。持佛名號。將來同仗彌陀慈力。接引西方。超凡入聖。永證眞常。則其爲樂也。無能名焉。而眞德二公之憫世深心。亦可以稍慰也夫。民國戊寅除夕。滬濱三寶弟子喬智如謹跋。

印光法師曰。凡遇刀兵水火。惡病惡獸。怨家對頭。惡鬼毒蛇。種種危險者。果能至誠稱念南無觀世音菩薩。卽可蒙菩薩加被。轉危爲安。縱令定業難轉。喪身失命。亦可仗菩薩力。往生西方。則是因宿業而殞身命。蒙佛力而出苦海也。爰亟錄之。以爲世勸。

助印功德芳名

| | | | |
|---------|-----|---------|-----|
| 遠塵和尚 | 十元 | 德森法師 | 四元 |
| 坤地大師 | 十元 | 樂慧斌居士 | 十元 |
| 華墅居士 | 五元 | 孫劬卿居士 | 十元 |
| 程振之居士 | 十元 | 虞俊卿居士 | 十元 |
| 江振華居士 | 十元 | 夏德馨居士 | 十元 |
| 曹胡明圓 | 一百元 | 胡氏明德 | 五十元 |
| 章胡明培 | 五十元 | 元宏貞居士 | 四十元 |
| 胡陳蓮甫 | 十元 | 胡嚴蓮月 | 十元 |
| 伍周淑誠 | 十元 | 楊伍德芳 | 十元 |
| 洪李慧理 | 十元 | 洪葛蓮基 | 十元 |
| 洪氏明義 | 六元 | 金洪蓮貞 | 六元 |
| 洪氏懿涵 | 六元 | 顧許蓮昌 | 二元 |
| 願將以此勝功德 | | 消除刀兵饑疫劫 | |
| 世界安寧民賢善 | | 同發菩提生淨土 | |

民國二十八年五月初版印一萬冊

▲助勞集 第二集女德篇▼

編輯者 助勞社同人

流通處

蘇州木瀆鎮靈巖山寺
 上海新開路太平寺
 北成都路弘化社
 蘇州龍街南內
 穿心街報國寺
 上海法租界貝勒路寧學校
 義和里十六號
 上海南成都路新大沽路
 國光印書局
 電話三三七四三

印刷處

